

四庫全書

子部

欽定四庫全書

玉海卷一百四十七

宋 王應麟 撰

兵制

水戰

江漢湯湯武夫洸洸此水戰之始自古東南恃此以
收制敵之功

周蒼兕舟楫

史記齊世家武王九年東伐以觀諸侯集否師行師尚
父左杖黃鉞右把白旄以誓曰蒼兕蒼兕總爾衆庶與
爾舟楫遂至盟津諸侯不期而會者八百索隱本或作
蒼雉案馬融曰蒼兕掌舟楫官名又王充論衡蒼兕水
獸九頭今誓衆令急濟故言蒼兕以懼之 邢子才文
蒼雉奉職靈鼉自梁 晉令水戰有飛雲船蒼集船先
登船飛鳥船

晉舟虞

魯語諸侯伐秦及涇莫濟晉叔向召舟虞與司馬曰夫
苦匏不材於人共濟而已魯叔孫賦匏有苦葉必將
涉矣具舟除隧不共有法是行也魯人以莒人先濟
諸侯從之注舟虞掌舟司馬掌兵舟虞具舟司馬除
道

楚舟師

左傳襄二十四年楚子為舟師以伐吳不為軍政無功

而還

注舟師
水軍

昭十七年吳伐楚戰于長岸大敗吳師獲

其乘舟餘皇

舟名

十九年楚子為舟師以伐濮二十四年

楚子為舟師以略吳疆二十七年與吳師遇于窮令尹
子常以舟師及沙汭而還定二年楚囊瓦伐吳師吳人
見舟于豫章敗之四年蔡吳唐伐楚舍舟于淮汭自豫
章與楚夾漢左司馬戌謂子常曰子沿漢而與之上下
我悉方城外以毀其舟六年吳太子終累敗楚舟師哀
十年吳徐承帥舟師將自海入齊齊人敗之

吳乘舟餘皇

左傳昭十七年吳伐楚戰于長岸子魚先死楚師繼之
大敗吳師獲其乘舟餘皇吳子光請於衆曰喪先王之
乘舟豈惟光之罪衆亦有焉請籍取以救死衆許之使
長鬣者三人潛伏於舟側曰我呼餘皇則對師夜從之
三呼皆迭對楚人從而殺之楚師亂吳人取餘皇以歸
史記公子光伐楚敗而亡舟光懼襲楚復得王舟而
還注舟名餘皇 吳語將舟戰於江 漢馬融傳方餘
皇連舫舟張雲帆施蜺幃 吳越春秋越使范蠡入吳

國徙其大舟注餘皇舟也

蜀王本紀秦為大白船

夏艘欲以攻楚注大白船名

越習流

史記勾踐發習流二千伐吳 吳越春秋同 左傳

哀十七年越伐吳吳禦之笠澤夾水而陳越子以三軍

潛涉當吳中軍而鼓之吳師大亂 越絕書越為大翼

小翼中翼為船軍戰

漢樓船 黃頭

刑法志外有樓船按漢官儀云高祖命天下選能引關
蹶張材力武猛者以為輕車騎士材官樓船常以秋後
講肄各有員數平地用輕車山阻用材官水泉用樓船
列傳枚乘說吳王曰漢遣羽林黃頭循江而下注羽
林黃頭郎習水戰者也鄧通以濯船為黃頭郎注濯
船能持濯行船也土勝水其色黃故刺船之郎皆著黃
帽因號黃頭郎伍被傳吳王伐江陵之木以為船
為淮南王畫計曰有尋陽之船嚴助傳閩越王入

燔尋陽樓船注漢有樓船貯在尋陽也建元三年助浮
海救東甌武帝欲伐南越淮南王安諫曰前時南海王
反擊之會天暑多雨樓船卒水居擊擢未戰而疾死者
過半朱買臣為會稽太守詔到郡治樓船備糧食水
戰具朝鮮元封二年遣樓船將軍楊僕從濟浮渤海
擊朝鮮卜式上書請父子與齊習船者往死南
越本紀武元鼎五年南越呂嘉反遣伏波將軍路
博德出桂陽下湟水樓船將軍楊僕出豫章下浚水歸

義越侯嚴為戈船將軍出零陵下離水甲為下瀨將軍
下蒼梧皆將船十萬人元鼎六年東越王反遣樓船將
軍楊僕出豫章擊之注伍子胥書有戈船以載干戈因
謂之戈船又伍子胥書有下瀨船 食貨志粵欲與漢
用船戰遂迺大修昆明池列館環之治樓船高十餘丈
旗幟加其上甚壯元鼎五年南越反因南方樓船士二
十餘萬人擊之 地理志廬江郡有樓船官

漢戈船

武紀元鼎五年夏四月南粵呂嘉反秋遣歸義越侯嚴
為戈船將軍出零陵下離水注師古曰船下安戈戟以
禦蛟鼉之害也 史記南越傳戈船下厲將軍

厲一作瀨

吳都賦戈船掩於江湖 地理志牂柯係船牂也楚王
伐夜郎牂船於岸乃改其名為牂柯 韓信擊魏王
豹益為疑兵陳船欲渡臨晉而伏兵從夏陽以木罌渡
軍襲安邑

漢船司空 輯濯令

地理志京兆尹船司空注本主船之官遂以名縣芥曰船利百官表水衡有輯濯令丞注如淳曰船官也

劉屈氂傳戾太子矯制發輯濯士注輯及濯行船者短曰輯長曰濯與輯擢同元后傳張周惟輯濯越歌

漢昆明池習水戰

紀元狩三年秋發謫吏穿昆明池注臣瓚曰西南夷傳有越嶲昆明國有滇池方三百里漢使求身毒國而為昆明所閉今欲伐之故作昆明池象之以習水戰食

貨志武帝時粵欲與漢用船戰遂乃大修昆明池列館
環之治樓船高十餘丈旗幟加其上甚壯 西京雜記武
帝作昆明池欲伐昆明夷教習水戰 黃圖昆明池有
百艘樓船上建樓櫓戈船各數十上建戈矛四角悉垂
幡葆麾蓋 曹毗志經樓船上建樓櫓戈船上建戈矛
又作二石人東西相對象牽牛織女 郡縣志昆明池
在京兆府長安縣西十八里武帝穿此池象滇池作戈
船樓船數百艘於其中

漢樓船露橈

岑彭傳建武九年公孫述遣其將將數萬人乘枋單下

江關

枋單以木竹為之浮於水上爾雅曰舫計也郭景純曰水中籊筏也

擊破馮駿等遂

拔夷道夷陵橫江水起浮橋鬪樓立櫓柱絕水道以拒

漢兵彭裝直進樓船冒突露橈數千艘

並船名樓船之上施樓橈小櫓

也爾雅曰櫓謂之橈露橈謂露櫓在外人在船中

十一年春彭與吳漢發桂陽

零陵長沙委輸卓卒凡六萬餘人

卓卒持棹行船也

騎五千匹

會荊門吳漢以三郡棹卒多費糧穀欲罷之彭上書言

欽定四庫全書

狀帝報曰大司馬不曉水戰荆門之事一由征南公彭
乃令軍中募攻浮橋船逆流而上直衝浮橋飛炬焚攢
柱順風並進所向無前

魏舟師

三國志

通鑑

漢建安十三年曹操還鄴作玄武池以肄舟

師黃初六年帝為舟師復征吳帝以舟師自譙循渦入
淮蔣濟表言水道難通帝不從時天寒冰舟不得
入戰船數千皆阻不得行濟鑿地為四五道蹀船

令聚豫作土豚遏斷湖水 通典後漢魏武船戰
令

魏水軍

三國志

通鑑

建安十三年諸葛亮曰關侯水軍精甲萬人且

北方之人不習水戰曹公遺孫權書曰今治水軍八十

萬方與將軍會獵於吳十四年曹公引水軍自渦入淮

出肥水軍合肥開芍陂屯田 黃初二年帝為水

軍親御龍舟循蔡潁浮淮如壽春至廣陵吳為疑

城假樓又大浮舟艦于江帝曰魏雖武騎無所用之

吳蒙衝鬪艦

吳志曹公遺書曰今治水軍與將軍會獵於吳張昭等曰操得荊州水軍蒙衝鬪艦浮以沿江長江之險已與我共之矣周瑜曰曹舍鞍馬仗舟楫遠涉江湖之間不習水土禽操宜在今日瑜與劉備進與曹公過於赤壁瑜部將黃蓋取蒙衝鬪艦十艘載燥荻枯柴灌油其中

裹以帷幙上建旌旗豫備走舸繫於其尾時東南風急
蓋以十艦最著前中江舉帆餘船以次俱進去北軍二
里餘同時發火火烈風猛船往如箭燒盡北船延及岸
上營落烟焰漲天瑜等率輕銳繼其後雷鼓大進
曹公軍敗退 孫權擊黃祖祖橫兩蒙衝挾守沔
口大紂繫矴千弩交射軍不得前董襲凌統各將
敢死百人人被兩鎧乘大船突於蒙衝裏以刀斷
紂大兵遂通 將軍賀齊性奢所乘船雕刻丹鏤

釋名上下重版

曰艦

四方施版以禦矢如牢檻

外狹而長曰艨

衝以衝突敵船

吳

志曹公出濡須孫權使董襲督五樓船注濡須口

吳飛雲蓋海

周瑜傳孫權乘飛雲大船 吳都賦弘舸連舳巨檻接

艦飛雲蓋海制非常模注銑曰飛雲船上樓名甚高者

蓋海言多也劉曰飛雲蓋海吳樓船之有名者 江表

傳孫權乘飛雲大船與張昭魯肅等共追送叙別

晉水軍

羊祜傳帝與祜謀伐吳祜以伐吳必藉上流之勢又時吳有童謠曰阿童復阿童銜刀浮渡江不畏岸上獸但畏水中龍祜聞之曰此必水軍有功但當思應其名者耳會益州王濬為大司農祜知其可用濬又小字阿童因加龍驤將軍密令修舟楫為順流之計祜上疏曰吳俗急速不能持久弓弩楯不如中國唯有水戰是其所

便一入其境則長江非復所固

杜預傳太康元年正

月陳兵于江陵遣奇兵八百汎舟夜渡以襲樂鄉多張旗幟起火巴山吳都督孫歆懼與江陵督伍延書曰北來諸軍乃飛渡江也

晉連舫

王濬傳武帝謀伐吳詔濬修舟艦乃作大船連舫方百二十步受二千餘人以木為城起樓櫓開四出門上皆得馳馬來往又畫鷁首惟獸於船首以懼江神舟楫之

盛自古未有濬造船於蜀其木柿蔽江而下吳彥取柿
呈孫皓曰宜增建平兵皓不從彥乃為鐵鎖橫截江險
又作鐵椎暗置江中濬知狀乃作大筏數十亦方百餘
步縛草為人令善水者以筏先行筏遇鐵椎輒著筏去
又作火炬長十餘丈大數十圍灌以麻油在船前遇鎖
然炬燒斷剋樂鄉獲水軍督陸景於是順流鼓棹徑造
三山皓遣張蒙率舟軍禦濬蒙望旗而降 孫楚傳遺
孫皓書曰國家整器械興造舟楫簡習水戰樓船萬艘

千里相望剡木以來舟車之用未有如今日之殷盛者也

晉指南舟

宋志晉代又有指南舟

晉蒙衝小艦

陶侃禦陳敏寇用運船為戰艦 梁裴邃征邵陽洲密

作沒突艦破之 梁王僧辯討侯景賊望官軍有雙龍

扶艦 梁王琳每戰勝艦則有聲如野猪其戰艦千數

以野猪為名 柳文安南都護誌陸連長轂海合艫
艫

晉水軍

通鑑劉裕為晉太尉義熙十二年戒嚴伐秦沈林子劉
遵考將水軍出石門自渡河王仲德水軍入河將通魏
滑臺十三年裕引水軍發彭城自淮泗入清河將沂河
西上先遣使假道於魏魏兵十萬屯河北岸裕乃引軍
入河裕至潼關王鎮惡帥水軍自河入渭以趨長安秦

主泓使姚丕守渭橋以拒之鎮惡沂渭而上乘蒙衝小
艦行船者皆在艦內秦人但見艦進驚以為神至渭橋
鎮惡令軍士食畢持仗登岸即密使人解放舟艦渭水
迅急倏忽不見衆騰踊爭進大破姚丕軍 宋桓護之
以百舸為前鋒據石濟魏人以所得戰艦連以鐵
鑊三重斷河以絕河水迅急護之中流而下每至
鐵鎖以長柯斧斷之唯失一舸餘皆完備而返 梁韋
叡拒魏軍叡裝大艦使馮道根為水軍鬪艦臨魏壘以

小船載草灌膏焚其橋 侯景使侯子鑒為水戰之備
以鵠舫千艘並載土王僧辯麾細船令退留大艦夾泊
兩岸子鑒趨之大艦斷其歸路合戰江中景兵大敗

梁王琳引合肥巢湖之衆舳舻相次而下陳侯瑱率軍
進屯檻洲明日合戰琳軍少却及夕東北大風吹其舟
艦並壞夜中有流星墜于賊營及旦風靜琳入浦以鹿
角繞岸不敢復出時西魏將史寧躡其上流瑱聞之知
琳不能持久收軍却據湖浦以待其斃及史寧至圍郢

州琳恐衆潰乃率船來下去蕪湖十里而泊明日齊人遣兵助琳瑱令軍士晨炊蓐食頓蕪湖尾以待之將戰有微風至自東南衆軍施拍縱火定州刺史章昭達來平虜大艦中江而進琳軍大敗脫走以免者十二三歐陽紇據嶺南反陳將章昭達討之紇乃出頓涯口聚沙石盛以竹籠置水栅外用過船艦昭達居其上流裝艦造拍以臨賊栅又令軍人銜刀潛行水中斫竹籠籠蔑皆解因縱大艦隨流突之賊衆大敗

隋五牙大艦

楊素傳進取陳之計居永安造大艦名曰五牙上起樓
五層高百餘尺左右前後置六拍竿並高五十尺容戰
士八百人旗幟加於上次曰黃龍置五百人自餘平乘
舫艦等各有差素引舟而下三峽陳以青龍百餘艘守
狼尾灘素夜帥黃龍數千艘銜枚而下遂帥水軍東下
舟艦被江旌甲曜日陳江中無一鬪船呂忠肅據巫峽
鑿岩綴鎖橫截上流以遏隋船擊之四十餘戰隋兵死

者五千餘人既而隋師捷忠肅棄柵復據荊門延州素遣五牙四艘以拍竿碎其艦遂大破之

唐昆明池習水戰

紀武德九年三月庚寅幸昆明池習水戰壬辰至自昆明池

唐戰艦 浮海大航

河間王孝恭傳及李靖擊蕭銑帥戰艦二千餘艘東下大破銑軍乘勝直抵江陵入其外郭又攻水城拔之大

獲舟艦靖命盡散之江中諸將皆曰破敵所獲當藉其
用奈何棄之靖曰蕭銑之地南出嶺表東距洞庭吾懸
軍深入若攻城而下援兵見之必謂江陵已破未敢輕
進往來窺伺動踰旬月吾取之必矣銑援兵見舟艦果
疑不進靖進圍之銑內外阻絕乃降 曹王臯傳教戰
艦挾二輪蹈之鼓水疾進駛于陣馬 閻立德傳太宗
時為匠即洪州造浮船大航

唐樓艦

韓滉傳為鎮海節度使造樓船三千柁以舟師由海門
大閱至申浦乃還 錢鏐伐吳錢傳瓘帥戰艦五百
艘皆載灰豆及沙戰于狼山江傳瓘使順風揚灰吳
人不能開目又散沙於已船散豆於吳船豆為戰血
所漬吳人踐之皆僵仆因縱火焚吳船 後梁賀瓌
以竹竿聯艨艟十餘艘蒙以牛革設睥睨戰格橫於
河渚

建隆造船務習水戰

建隆二年正月壬辰幸造船務觀習水戰三年丙戌又
幸乾德元年正月觀造戰船乾德元年上使諸軍
習戰艦于迎鑾坡唐主懼甚

乾德講武池習水戰 水虎捷

實錄建隆四年

即乾德元年

四月庚寅內出緡錢募諸軍子

弟數千人鑿池於朱明門外令右神武上將軍陳承昭
護其役將習水戰也乾德元年四月鑿池於朱明門

外引蔡水注之造樓船百艘選卒號水虎捷習戰池中

編長

一云建隆四年鑿大池於京城之南在玉津園東抵宣化門外引蔡水注之其年六月既成名教船池造樓船百艘選精卒號水虎捷習戰池中

開寶講武池

開寶三年冬十月幸造船務命水工駕雜修樓船以習水戰 開寶六年三月壬午詔以教船池為講武池七年將有事於江南是歲凡五臨幸觀習水戰 六月己酉命宋延渥帥禁旅數千習戰於新池上數

臨觀七月丁卯幸武成王廟遂幸新池觀習水戰

乾德元年二月慕容延釗遣戰棹都監武懷節等分兵

趣岳州大破賊軍於三江口獲船七百餘艘

解暉傳偽統軍使黃

從志以岳州拒令暉率舟師討平之
月遣使往涪瀘戎等州閱擢手增置水軍

二年十二月

劉光義等入峽路生擒戰棹指揮使奪戰艦二百餘艘

斬獲水軍六十餘初蜀於夔州鑠江為浮梁上設敵棚

三重夾江列礮具上出地圖指其處謂光義曰泝江至

此切勿以舟師爭勝當先遣步騎潛擊之俟其稍却乃

以戰棹夾攻可必取也 五年上嘗幸講武池臨流

觀水戰顧謂左右曰人皆言忘身為國然死者人所難言之易耳李進卿前對曰如臣者令死即死耳遂躍入池中上急令水工救之 開寶二年五月契丹兵分道

入寇韓重贇陣于嘉山以待之戊子幸城東命水軍乘小舟載纒弩進攻其城 是月己酉幸城南命水軍乘輕舟焚北漢主門 七年閏十月己酉曹彬等入池州先是上遣八作使郝守濬率丁匠自荆南以大艦載巨

竹短并下朗州所造黃黑龍船於采石磯跨江為浮梁
或謂江濶水深古未有浮梁而濟者乃先試於石牌口
既成丁巳曹彬等及江南兵戰於銅陵敗之獲戰艦二
百餘艘

太平興國金明池習水戰

太平興國元年詔以卒三萬五千人鑿池以引金河水
注之有水心五殿南有飛梁引數百步屬瓊林苑每歲
三月初命神衛虎翼水軍教舟楫習水嬉西有教場亭

殿亦或臨幸閱砲石勁弩雍熙元年四月幸金明池觀
習水戰上御水心殿以觀戰艦角勝鼓譟以進往來馳
突必為回旋擊刺之狀顧侍臣曰兵棹南方之事也今
既平定固不復用但時習之不忘武功耳 紀太平興
國二年二月乙巳幸新鑿池賜穿池卒人十錢布一端
三年二月始鑿金明池七年十月戊辰幸金明池御龍
舟觀習水戰 又雍熙二年四月丙申幸四年四月丁
未幸觀水嬉因習射又九月丙寅因登水心殿射淳化

二年三月乙卯幸御水心殿觀水嬉又淳化三年三月
庚申幸金明池觀水嬉命為競渡之戲 祥符二年四
月丁亥賜金明池善泅軍士緡錢 太祖朝製造兵棹
防水路時神衛立水軍及江淮平定不復振舉真宗於
江浙淮南選取習水兵士立成指揮

太平興國渡河大船 神舟

太平興國四年征北漢

至道二年八月江淮發運使楊允恭捕取私鹽賊送闕

下上貸之曰此等越逸江湖習性已久固不能工作可
團為一軍以備舟楫之用號平河軍

咸平戰船式

咸平三年八月戊申造船務匠項綰等獻轉海船式

景德金明池觀水戰

會要

原闕

祥符神衛水軍

大中祥符六年詔在京諸軍選江淮習水卒於金明池

按試戰棹立為水虎翼軍置營池側其江浙淮南諸州亦令准此選卒置營初太祖立神衛水軍及江淮平定不復振舉上以兵備不可廢故復置焉七年五月詔諸州簡兵有善水者以補神衛水軍

天聖金明池觀水嬉

六年

原闕

嘉祐二年三月二十二日命契丹使觀金明池水嬉
熙寧二年四月三日元豐二年四月辛丑幸觀水嬉

建炎樓船凌波軍

建炎元年六月二十一日置水軍以習水戰號樓船軍
從李綱之請也 會要建炎元年六月宰臣李綱言守
備之策當於沿河沿淮沿江置帥府要郡以控扼將佐
軍兵云云瀕河江淮去處帥府別置水兵二軍要郡別
置水兵一軍次要郡別置水兵半軍以習水戰並招募
習水善波操舟便利之人今擬判軍號樓船軍凌波軍
詔並從之

建炎江淮習水戰

建炎三年正月呂頤浩言水戰之具在今宜講然防淮難防江易近雖於鎮江之岸擺泊海船而上流諸郡自荆南抵儀真可渡處甚多望置使兩員一專提舉造船且詢水戰利害

建炎海船

建炎四年烏珠回至鎮江夏四月烏珠自明州回韓世忠先屯焦山以邀其歸路烏珠遣人約戰世忠伏兵擊

之俘獲甚衆及其舟十餘艘虜不得濟求假道相持于
黃天蕩世忠募通船百餘艘泊金山下預命工鍊為長
綆大鈎虜擁千舟而前世忠分海船出其背縋一綆則
曳一舟虜不得渡募人獻破海舟之策乃以輕船絕江
而遁

紹興飛虎戰艦

紹興二年七月丁丑無為軍守臣王彥恢言大江以南
欲控扼非戰艦不可制飛虎戰艦傍設四輪每輪八槳

四人旋幹日行千里又有神武戰車比之蒙衝偏箱鹿角此尤至要詔就本軍措置

紹興戈船

紹興十一年十月十九日知秀州方滋以戈船先辦除直祕閣三十一一年虞允文趨采石列軍為陣分戈船為五虜與官軍步戰戈船並進虜舟皆沉沒水為之丹一本云虜至楊林瞰江恃軍以為師可渡也李顯忠措置依山列馬步軍五分戈船以其二泊於東西岸其

一泊中流其二於廬州港中頃之虜漸登陸遣王琪等擊之及速遣戈船并進以神臂尅敵弓射之賊退遁港中所匿戈船出斷其後奪賊船二千餘艘繼以輕舸焚其戰船

紹興海鯨船

紹興三十一年十一月金人亮欲由采石而渡命虞允文趣李顯忠代王權所留水軍車船咸在而諸將未有統屬允文使人督之敵舟漸近我軍用海鯨船迎擊敵舟

多沉溺縱火自焚其舟走瓜洲 繫年錄紹興三十一年十一月金亮在瓜洲鎮揚存中虞允文恐車船臨時不堪用乃臨江拽試命戰士踏車船徑趨瓜洲將迫岸復回中流上下三周金山回轉如飛是年十月李寶與金人舟師遇於密州膠西縣敵帆皆以油纈為之寶以火箭射之煙焰燒延火不及者猶欲前拒寶命健士躍登其舟以短兵殲之舟中其餘皆中原舊民脫甲而降者三千餘人

紹興水軍

原闕

隆興御前水軍

隆興元年九月詔諸州召募水手於手上刺某州水軍

字以革冒代之弊

五年秋又增五百人

建炎以來朝野雜記平

江許浦水軍本明州定海水軍也舊隸沿海制置司乾道中改隸殿前司以三千人為額五年冬又改為御前水軍八年春併歸許浦淳熙四年冬以七千為額江陰

水軍舊自泉州調發乾道三年以其勞費奏留屯二千
人於江陰軍而沿海制置司又別屯千人淳熙末增置
四千此外左翼軍亦有水軍三千摧鋒軍二千福州延
祥寨千人鎮江建康池江鄂州御前諸帥亦各有水軍
其後殿司又有澈浦水軍而淮陰靖安唐灣采石諸水
軍則皆冠以御前水軍之號

淳熙多鑿飛江船

淳熙三年十一月進呈建康都統郭剛奏本司車船損

已補填依海船樣造多槳飛江船上曰車船古之艤衝
卒已用兵取勝宜改造其多槳船止許逐軍自行創
造不得充新營車船數

武經總要吳人以舟楫為輿馬以巨海為平道是
其所長春秋時吳以舟師伐楚又越軍吳軍舟戰
于江伍子胥對闔閭以船軍之教比陸軍之法大
翼者當陸軍之車小翼者當輕車突冒者當衝車
樓船者當行樓車樓船者當輕足驃騎公輸般自

魯之楚為舟楫之具謂之鈎拒退而鈎之進則拒之

舟師可以進可以守東南之師趨三齊者向淮入泗而

止

劉裕伐南燕至下邳

趨河北者自汴入河而止

桓溫伐燕至枋頭

捨舟

登陸尚得半利趨關中者自河而入徑至長安

王鎮惡

水

陸並進可得全利此以舟師進者也塞建平之口使自

三峽者不得下

王濬揚素自此而下

據武昌之要使自漢水者不

得進

漢入江處正直江夏何尚之言夏口在荆江之中正對沔口通接雍梁實為津要由來舊鎮根本不

易守采石之險使自合肥者不得渡

韓擒虎渡處

防瓜步之

津使自盱眙者不得至

魏太武來處

此以舟師守者也闔艦

之制近世太精昔人智巧殆不能及胡虜望之驚若鬼神限以際夫之水駕以如山之浪彼雖虎兕豺狼莫敢前也

玉海卷一百四十七

欽定四庫全書

子部

玉海卷一百四十八

詳校官中書臣張經田

主事臣祁韻士覆勘

總校官進士臣朱

鈐

校對官中書臣徐秉敬

謄錄監生臣呂燕昭

欽定四庫全書

玉海卷一百四十八

宋 王應麟 撰

兵制

馬政

古者牧養之馬有養之官有藏之於民官民通牧者
周也牧於民而用於官者漢也牧於官而給於民者
唐也

黃帝馬師

列仙傳

劉向撰

馬師皇者黃帝馬師

淮南子黃帝治天

下飛黃服皂

呂氏春秋乘雅作駕寒哀作御

夏九代馬

山海經大樂之野夏后啓於此舞九代馬乘兩龍 文

選王元長序夏后兩龍載驅璿臺之上注良曰夏后啓

有馬號為兩龍乘游於璿臺之上以饗諸侯百官也

殷牧師

後漢西羌傳殷太丁之時周季歷復伐燕京之戎後二
年周人克余無之戎於是太丁命季歷為牧師注季歷
文王之父也竹書紀年曰太丁四年周人伐余無之戎
克之周王季命為殷牧師秦紀費昌為湯御太戊使
中行為御呂氏春秋伊尹說湯曰青龍之匹遺風之
乘注馬名詩出車我出我車於彼牧矣注出車就馬於
牧地我我殷王也禹貢萊夷作牧注可以牧記夏戎
事乘驪殷戎事乘翰周乘駟夏駟馬黑鬣殷白馬黑首

周黃馬蕃鬣

疏魯有三代之馬

宋志夏馬駟殷馬駟周馬駟

周十二閑 六廐 馬政

夏官校人中大夫二人上士四人下士十有六人

注校人馬

官之 掌王馬之政

注政謂差擇養乘之數也月令曰班馬政左傳昭公二十七年楚都君

子及王馬之屬注王之養馬官屬校人也 辨六馬之屬種馬一物戎馬一物

齊馬一物道馬一物田馬一物駕馬一物

玉路駕種馬戎路駕戎馬

金路駕齊馬象路駕道馬田路駕田馬駕馬給宮中之役詩車攻我馬既同注宗廟齊奏尚純也戎事齊力

尚強也田獵齊足尚疾也魯頌正義天子戎路無飾故卑於象路戎馬尚強故先於齊馬詩六月比物四

驪注毛物也正義戎車雖以齊力為主亦不厭其同色故曰駟驪彭彭又曰乘其四騏田獵齊足而曰四黃既駕皆同色也無同色者乃取異毛騏駼是中騏驪是騄是也

轉人國馬之轉注國馬謂種戎齊道馬高八尺

凡頒良馬而養乘之乘馬一師四圉三乘為皐皐一趣馬三皐為繫繫一馭夫六繫為廢廢一僕夫六廢成校

校有左右駕馬三良馬之數麗馬一圉八

八疑為六麗字之誤

一師八師一趣馬八趣馬一馭夫

良善馬五路之馬鄭司農云四匹為乘養

馬為圉康成謂二耦為乘自乘至廢其數二百一十六匹易乾為馬此應乾之災也至校變為言成者明六馬各一廢此云六馬者蓋合下駕馬三分之一言之自此而王馬小備也校有左右則良馬一種者四百三十二

匹五種合二千一百六十匹駕馬三之則為千二百九十六匹五良一駕凡三千四百五十六匹然後王馬大備詩云駉牝三千此謂王馬之大數與麗偶也駉馬自圉至駉夫凡馬千二十四匹與三良馬之數不相應八皆為六字之誤也師十二匹趣馬七十二匹則駉夫四百三十二匹然後而三之無僕夫者不駕於五路卑之

也天子十有二閑

每廐為一閑

馬六種邦國六閑

晉六駉

馬四

種家四閑馬二種

諸侯無種戎而有齊道田駕大夫有田馬其駉馬皆分為三魯頌傳有

良戎而無齊道

凡馬特居四之一春祭馬祖執駒

馬祖天駒也

夏祭

先牧頒馬攻特

先牧始養馬者

秋祭馬社臧僕

馬社始乘馬者臧僕謂簡練駉

者世本相土作乘馬

冬祭馬步獻馬講馭夫

馬步神為災害馬者

凡大祭祀

朝覲會同毛馬而頒之軍事物馬而頒之

毛馬齊其色物馬齊其力

趣馬

下士卑一人

掌贊正良馬而齊其飲食簡其六節

注差

王馬以為六等

書立

巫馬

下士二人

掌養疾馬而

政趣馬小尹庶常吉士

醫四人

乘治之

牧師

下士四人

掌牧地皆有厲禁而頒之孟春焚

牧中春通淫掌其政令凡田事贊焚萊

廋人

下士二人

掌十有二閑之政教以阜馬佚特教駢

音聲

攻駒及祭馬

祖祭閑之先牧及執駒散馬耳圉馬

九者皆有政教

正校人員

選

校人謂師圉也

馬八尺以上為龍

月令駕蒼龍

七尺以上為騊

詩騊

北三 六尺以上為馬 圉師乘一人 四馬為乘 掌教圉人養

馬春除蓐疊廄始牧夏庠馬冬獻馬 蓐馬茲也馬既出而除之新疊馬神

之也庠音雅庠廡 所以庇馬涼也 圉人良馬匹一人駕馬麗一人 麗耦

也 掌養馬芻牧之事以役圉師凡賓客喪紀牽馬而入

陳獻馬亦如之 周秩官曰司馬陳芻注司馬掌帥圉人養馬故陳芻周制曰國有郊牧注放

牧之地哉 師有牧田 馬質 中士二人 掌質馬馬量三物曰戎田駕皆

有物賈網惡馬禁原蠶 注天文辰為馬蠶書蠶為龍精 馭夫分公馬

而駕治之 注乘調六種之馬 秋官蠻隸掌役校人養馬 月

令仲夏班馬政

養馬之政教廋人職曰掌十有二閑之政教

季秋班馬政命

僕及七駟咸駕

馬政謂齊其色度其力使同乘也

周官馬政養之以

阜乘廋校視之以圉牧廋巫設祖牧社步之祭以

謹其本時出入游靡之節以宣其性情分庠棧牝

牡之別以一其種嚴攻講刻剔之策以就其才又

為之禁原驅蠶網惡去害

春祭房星尊祖也夏祭

先牧尚養也秋祭馬社敬乘也冬祭馬步存祖也 稚

之秣之斯馬斯才既伯既禱有駉有容芻秣之式掌于

太宰以馬名卿列于夏官 駟駟彭彭武王所乘駟鐵
孔阜秦襄以田是齊色不專宗廟 詩正義干旄傳駟
馬五轡王肅云古者一轅之車駕三馬則五轡其
大夫皆一轅車夏后氏駕兩謂之麗殷益以一駟
謂之駟周人又益一駟謂之駟本從一駟而來亦
謂之駟王基云商頌約軼錯衡八鸞鏘鏘則殷駕四
不駕三也又異義天子駕數易孟京春秋公羊說天子
駕六毛詩說天子至大夫同駕四士駕二詩之四駟彭

彭武王所乘龍旂承祀六轡耳耳魯僖所乘四牡駢駢
周道倭遲大夫所乘禮王度記天子駕六諸侯與卿同
駕四大夫駕三士駕二庶人駕一說與易春秋同立之
聞也周禮校人乘馬一師四圉四馬為乘此一圉養一
馬而一師監之也尚書布乘黃朱言獻四黃馬朱鬣也
既周天子駕六則校人何不以馬與圉以六為數諸侯
何以不獻六馬王度記曰大夫駕三經傳無所言是自
古無駕三之制也 詩吉日庚午疏必用午日者蓋於

辰午為馬故也 無羊疏擬駕用者屬牧師令生息者
屬牧人

周戎馬

左傳成元年三月作丘甲注周禮九夫為井四井為邑
四邑為丘丘十六井出戎馬一匹牛三頭四丘為甸甸
六十四井出長轂一乘戎馬四匹牛十二頭甲士三人
步卒七十二人此甸所賦今魯使丘出之正義注多是
司馬法而以周禮冠之以司馬法祖述周禮所陳即周

法也司馬法六尺為步步百為畝畝百為夫夫三為屋
屋三為井四井為邑四邑為丘丘有戎馬一匹牛三頭
是曰匹馬丘牛四丘為甸甸六十四井出長轂一乘馬
四匹牛十二頭甲士三人步卒七十二人戈楯具謂之
乘馬鄭注論語云司馬法成方十里出革車一乘注小
司徒云成出革車一乘甲士十人徒二十人與此不同
者謂公卿大夫畿內采地之制此謂諸侯邦國出軍之
法甸即乘也六十四井出車一乘故以甸為名書周

官注夏官卿主戎馬之事掌國征伐 詩秦駟驥四馬
既閑正義四種之馬諸侯無種戎四馬當八轡言六轡
者以驂馬內轡納之於軼故在手唯六轡聘禮云賓覲
總乘馬注云總八轡牽之謂贊者步牽馬故八轡皆在
手也大叔于田言六轡如手謂馬之進退如御者之手
為御之良此言在手謂不假控制為馬之良 曲禮前
有車騎則載飛鴻疏古人不騎馬經典無言騎者今言
騎是周末時禮 陸氏曰古稱黃帝以車戰蚩尤以騎

戰又齊魯相遇以鞍為几則軍之有騎尚矣

詳見後

周八駿圖

穆天子傳癸酉天子命駕八駿之乘右服𩇑騮而左騄耳右騄赤龍

古騄字

而左白儀天子主車造父為御商角

為右次車之乘右服渠黃而左踰輪右騄盜驪而左山子柏天主車參伯為御奔戎為右至于黃澤官樂謡曰黃之池其馬飲沙皇人威儀黃之澤其馬飲玉皇人壽穀列子周穆王肆意遠遊命駕八駿之乘左服𩇑

華字

騶而右綠耳右驂赤驥而左白灤

古義字

主車則造父為

御商

秦字丙

為右次車之乘右服渠黃而左踰輪左驂

盜驪

即鐵驪

而右山子柏天主車參百為御奔戎為右驅

馳千里至於巨蒐氏之國宿于崑崙之阿赤水之陽別

日升于崑崙之丘以觀黃帝之宮遂賓于西王母觴于

瑤池之上乃觀日之所入一日行萬里 史記秦本紀

造父以善御幸于周繆王得驥溫驪驊騮

一云華驪

綠耳之

四

集解郭璞曰紀年云北唐之君來見以一驪馬是生綠耳八駿皆因其毛色以為名號駟按穆天子傳有

八駿之乘此紀不具爾雅疏云穆天子傳丙寅天子
屬官効器乃命正公郭父受勅憲用中八駿之乘以飲
于枝棼之中積石之南河郭注云盜驪者為馬細頸綠
耳者紀年云北唐之君來見以一驪馬是生綠耳柳
宗元觀八駿圖說云好事
者為之圖宋齊以來傳之西巡狩樂而忘歸徐偃王作

亂造父為繆王御長驅歸周一日千里以救亂繆王以
趙城封造父白此為趙氏非子居犬丘好馬及畜善養
息之犬丘人言之周孝王孝王召使主馬于汧渭之間
馬大蕃息孝王曰昔栢翳為舜主畜畜多息故有土賜
姓嬴今其後世亦為朕息馬其分土為附庸邑之秦使

復續嬴氏祀 拾遺記穆王即位三十二年巡行天下

馭黃金碧玉之車傍氣乘風起朝陽之岳自明及晦窮
寓縣之表御八龍之駿一名絕地足不踐土二名翻羽
行越飛禽三名奔霄夜行萬里四名超影逐日而行五
名踰輝毛色炳耀六名超光一形十影七名騰霧乘雲
而奔八名挾翼身有肉翅逸而駕焉按轡徐行以匝天
地之域 書穆王命伯冏為太僕正正于羣僕侍御之
臣 造父為御周遊天下導其侈者果出于
僕御之間人心操舍之無常可懼哉

隋志五行

類有周穆王八馬圖

選七命注駿馬
圖有舍陽侯驃

國史志史道碩

畫八駿圖一卷 崇文目八駿圖一卷

小

唐李觀有

八駿圖序 柳宗元有觀八駿圖說

淮南子散宜生得騶虞難斯之乘 說文馬赤鬣縞身

目若黃金名曰媽吉皇之乘周文王時犬戎獻之 左

傳唐成公有兩驕驕馬 古今注秦始皇有七名馬一

追風二白兔三躡影四追電五飛翺六銅雀七晨鳧

張說集秦汧渺渺尚想非子之風魯野區區猶傳史克

之頌

穆王八駿有騂騶騄耳之號
漢文九遠有浮雲絕塵之目

周良馬

穆天子傳壬戌天子至于雷首犬戎觴天子雷首之阿

乃獻良馬四六天子使孔牙受之

水經注引云云
受之於雷水

已已

天子東征食馬于漂水之上

水經注
引之

水經注湖水出

桃林塞之夸父山其中多野馬造父于此得騂騶綠耳

盜驪之乘以獻周穆王使之馭以見西王母 揚雄河

東賦注師古曰翠龍穆天子所乘馬也

魯延廐 法廐 圻牧 晉六駟 小駟

左傳莊二十九年春新作延廐書不時也凡馬日中而出日中而入正義春分百草始繁則牧於圻野秋分農

功始藏水寒草枯則皆還廐此周典之制也

詩箋乘馬繫於廐無

事則委之以莖有事乃予之殺愛國用也

穀梁傳延廐者法廐也

注六閑之舊制

魯頌駟頌僖公也僖公牧於圻野駟駟牡馬有驕皇

驪黃

首章言良馬朝祀所乘故云彭彭

騅駟騅駟

二章言戎馬齊力尚強故云伾伾

驪

駟騅

三章言田馬齊足尚疾故云騅騅

駟駟驪魚

卒章言駕馬給雜使貴肥壯故云祛

祛思無疆期數邪馬思臧才作祖正義禮諸侯六閑馬

四種傳謂有良戎田駕不言齊道魯金象路共駕良馬
戎路駕戎馬田路駕田馬駕給宮中之役 衛風駉牝三

千

衛蒧邯鄲而有之馬數過禮制
齊語桓公封衛與之繁馬三百

命彼倌人

主駕者

秦風小戎文茵暢轂駕我騏驎四牡孔阜六轡在手騏

驎是中駟驪是騶伐駟孔羣公矛鏐鐔

李斯書乘
織離之馬

左

傳僖十五年晉乘小駟鄭入也慶鄭曰大事必乘其產

生其水土知其人心安其教訓服習其道

冀之北土馬
之所生無與

國馬 晉問云牽以荀息御
以王良超以范鞅歛以樂鉞

成十八年晉程鄭為乘

馬御六騶屬馬使訓羣騶知禮注六閑之騶周禮諸侯
有六閑馬正義周禮掌馬之官無名騶者襄三十三年
傳豐點為孟氏之御騶則騶亦御之類每廐有趣馬十

八人六閑之騶有一百八人

晉語謂之贊僕 晉屈產之乘 月令季秋班馬政

命僕及七騶咸駕注七騶謂趣馬主為諸官駕說者正義皇氏云天子馬有六種種別有騶則六騶也又有總主之人并六騶為七故為七騶

襄二十五年楚為掩賦車籍馬注籍

疏其毛色歲齒以備軍用 鄭有馬師 楚有監馬尹

官廩尹 楚語國馬足以行軍公馬足以稱賦

注國馬民馬公

馬公之戎馬也

韓非子秦穆公起卒革車五百乘疇騎二千

步卒五萬輔重耳入于晉

疇等也言馬齊等

史記蘇秦傳燕

車六百乘騎六千匹趙車千乘騎萬匹魏車六百乘騎

五千匹楚車千乘騎萬匹秦北有代馬

戰國策蘇厲說趙曰代馬胡駒

公羊注禮大夫以上至天子皆乘四馬所以通四方

也天子馬曰龍高七尺以上諸侯田馬高六尺以上卿

大夫曰駒高五尺以上 禮大司馬帥師執提鄭司

農云謂馬上鼓䟽曰先鄭蓋據當時已有單騎舉
以況周其實周時皆乘車無輕騎法也 春秋正
義古者馬以駕車六國時始有單騎蘇秦云車千
乘騎萬匹是也 司馬法孫子無騎戰吳起之為
武侯戰以車五百乘騎三千匹而破秦五十萬衆
其書六篇往往皆有騎戰蘇秦說六國於燕言騎六千
匹於趙楚言騎萬匹於魏言騎五千匹張儀說韓言秦
騎萬匹趙變胡服招騎射此皆戰國用騎戰之驗今六

韜言騎戰決非太公所作古亦未有無車而乘馬者故

易曰舍車而徒

餘又見周
戎馬段

漢五監 六廄 六牧師苑 三十六苑 騎

馬令 駿馬監 建章監 家馬官 長樂未

央廄 中廄令

百官表大僕秦官掌輿馬有兩丞屬官有大廄未央家

馬三令各五丞一尉

大廄者天子之法廄惠帝紀所謂
都廄也 家馬供天子私用非大

祀戎事軍國所需故謂之家
馬 上官禁為未央廄令

又車府路軫騎馬駿馬四

令丞又龍馬閑駒橐泉駒餘承華五監長丞

如淳曰橐泉廐在橐

泉宮下駒餘野馬也師古曰閑閑養馬之所也故曰閑駒駒餘出北海中其狀如馬非野馬也嚴安為騎馬

令又邊郡六牧師苑令各三丞

注師古曰漢官儀云牧師諸苑三十六所漢

儀注云太僕牧師諸苑三十六所景紀注如淳曰漢

儀注置北邊西邊以郎為苑監官奴婢三萬人養馬三

十萬又牧橐昆蹠令丞

橐橐昆蹠蹠好馬名也蹠音蹄爾雅曰昆蹠蹠善升甌者也師

古曰牧橐言牧養橐駝也郭璞

曰昆蹠善上山秦時昆蹠苑是也皆屬馬中太僕掌皇

太后輿馬不常置也武帝太初元年更名家馬為桐

徒孔

反馬樂志孔光奏省樂官七十二人給大官桐馬酒

初置路軫

五行志未央殿軾軾中云云孟

康曰廐名也

黃圖路軫蓋在未

央宮中掌宮門與馬亦曰未央廐

水衡都尉元鼎二年

初置屬官有技巧六廐令丞成帝建始二年

三月丙午

省技

巧六廐官

秋減乘與廐馬

漢舊儀云天子六廐未央

表太僕屬官已有大廐未央路軾騎馬駒駼承華而水

衡又云六廐技巧官是技巧之徒供六廐者其官別屬

水衡也 劉氏曰上林 地理志北地郡靈洲縣有河

自 有六廐一令丞主之 奇苑號北苑歸德縣有堵苑白馬苑郁郅縣有牧師苑

官

苑謂馬牧

遼東郡襄平縣有牧師官西河郡鴻門縣有天

封苑太原郡有家馬官

注漢有家馬廐一廐

功臣表

萬匹後改曰桐馬

燕史記

張良以廢將從起下邳王陵以廢將別定東郡南

陽祕彭祖為中廢令夏侯嬰為沛廢司御為滕令因奉

車復為太僕齊受以家車吏入漢

師古曰家車非軍國所用

紀文

帝二年十一月癸卯詔太僕見馬遺財足餘皆以給傳

置

賈山至言云省廢馬以賦縣傳去諸苑以賦農夫

昭帝始元四年七月詔

往時令民共出馬其止勿出諸給事中都官者且減之

元鳳三年正月罷中牟苑賦貧民

注在榮陽

元帝初元元

年九月詔太僕減穀食馬

貢禹言高祖文景循古節儉廢馬百餘匹今廢馬食粟將

萬匹惟深察古道從其儉者可無過數千匹
乃下詔太僕減殺食馬省宜春苑與貧民

二年三月

詔罷黃門乘輿狗馬五年四月詔乘輿秣馬無乏正事

而已 武紀太初二年五月籍吏民馬補車騎馬

武帝初廢

馬四十萬匹 鹽鐵論云賢良曰一馬伏

櫪當中家六口之食無丁男一人之事

列傳李陵

為建章監監諸騎

衛青亦為之

金日磾為馬監

日磾弟倫輸黃門養

馬

吾丘壽王願養馬黃門

衛青使咸宣買馬河東

召為廐丞

史記云大廐丞

傅介子元鳳中以駿馬監求使大

宛遷平樂監

戾太子傳發中廐車載射士

師古曰中廐皇后車

馬所在 楚有宮廄尹養由基 魏王朗曰西京中廄則駢駮駙馬六萬餘匹外牧則庖養三萬而馬十之

續志太僕有未央廄令長樂廄丞

鄭眾子安世為長樂未央廄令與宋

歷俱詣鴻都門注廄令秩六百石

本注舊有六廄令中興省約但置一

廄後置左駿令廄別主乘輿御馬後或并省太子廄長

一人四百石主車馬 古今注漢安元年七月置承華

廄令 安帝紀永初元年九月壬午詔廄馬非乘輿常

所御者皆減半食

漢九廄

三輔黃圖未央大廡在長安故城中翠華大輅果馬輓

梁騎馬大宛胡河駒駘

凡九廡

在長安城外霸昌觀馬廡

在長安城外都廡天子車馬所在中廡皇后車馬所在

太平御覽云黃圖未央宮有金廡輅輶廡大廡果馬廡輓梁廡騎馬廡大宛廡胡河廡駒駘廡凡廡九在城內

漢都廡 霸昌廡 交道廡 濯龍廡

惠紀三年七月都廡災

大廡者天子法廡所謂都廡也是時天子居未央宮供天子之

用也家馬供天子私用非戎祀軍國所須故謂家馬也騎馬所用雖未詳然非天子所御也龍馬以下五監皆牧養之所也牧索師古曰牧養索駘也昆駘爾雅云昆駘野善升駘郭璞謂駘如駘而健上山秦時有駘駘苑是

也邊郡六牧師苑漢官儀所謂三十六所是也此西都馬政之大畧

史記田叔還至霸

昌廢

括地志在雍州萬年東北三十八里郡國志在長安西二十五里

谷永傳敕過

交道廢勿追

注去長安六十里近延陵

文選赭白馬賦注盧植集

曰詔給濯龍廢馬三百匹

銑曰濯龍內廢名

晉志漢侍御史

五曹四曰尉馬曹掌廢馬

廢晉夫

田廣明傳

駙馬猥佐

楊惲傳給駙使乘之佐主猥馬吏也惠紀武士駙駙騎也

漢馬復令馬弩關

食貨志文帝時鼂錯說曰令民有車騎馬一匹者復卒

三人車騎天下之武備也故為復卒

師古曰當為卒者免其三人不為卒

者復其錢

武帝令民得畜邊縣官假馬毋三歲而歸及息什

一用充入新秦中車騎馬乏縣官錢少買馬難得乃著
令令封君以下至三百石吏以上差出牝馬天下亭亭
有畜字馬歲課息 武紀元狩五年春三月天下馬少
平牡馬匹二十萬注如淳曰貴平牡馬賈欲使人共畜
馬 西域傳征和中搜粟都尉弘羊請屯田輪臺以東
上詔曰當今務在禁苛暴止擅賦力本農修馬復令以

補缺母乏武備而已郡國二千石各上進畜馬方畧

補邊狀與計對

師古曰馬復因養馬以免雜賦也

貨殖傳馬蹏噉

千

為馬二百

景紀中四年春二月御史大夫綰奏禁馬

高五尺九寸以上齒未平不得出關 昭紀始元五

年夏罷天下亭母馬及馬弩關注孟康曰舊馬高五

尺六寸齒未平弩十石以上皆不得出關今不禁也

新序上從主父偃之計因關馬及弩不得出

唐貞

元二年八月庚戌禁大馬出蒲潼武關會要作元年

霍去病傳衛霍兩軍之出塞閱官及私馬凡十四

萬匹後入塞不滿三萬匹乃置大司馬位大將軍票

騎皆為大司馬

自青園單于後不擊匈奴者以漢馬少

王溫舒傳為

河內太守令郡具私馬五十匹為驛自河內至長

安

周校人六廄凡三千四百匹頒之官府卿大夫之共軍

事者也而丘甸之馬民自備之以從戎自井田既壞凡

有師役皆賦馬與民孝武末年籍吏民馬而課息徧于

天下古之軍賦殆不如此

漢苑馬

牧師苑

內外廄

又見前

流馬苑

景紀中六年六月匈奴入鴈門至武泉入上郡取苑馬

注如淳曰漢儀注太僕牧師諸苑三十六所分布北邊

西邊以郎為苑監官奴婢三萬人養馬三十萬匹師古

曰養鳥獸者通名為苑故謂牧馬處為苑

留侯曰關中北有胡苑之

利

食貨志景帝始造苑馬以廣用

師古曰為苑以牧馬

武帝時

告緡没入奴婢分諸苑養馬 昭紀元鳳二年六月詔

頗省乘輿馬及苑馬以補邊郡三輔傳馬

傳馬驛馬也

令郡

國母斂今年馬口錢 元紀初元二年六月省苑馬以振困乏 地理志武威以西水草宜畜牧故涼州之蓄為天下饒安定郡參縣有主騎都尉 和紀永元五年二月戊戌詔有司省減內外廄及涼州諸苑馬注漢官儀曰未央六廄長樂承華等廄今皆秩六百石又云牧師諸苑三十六所分置西北邊分養馬三十萬頭 安紀永初六年春正月庚申詔越雋置長利高望始昌三苑又令益州郡置萬歲苑犍為置漢平

苑 續志太僕有牧師苑皆令官主養馬分在河

西六郡界中

六郡隴西天水安定上郡北地西河

中興皆省唯漢陽

有流馬苑但以羽林郎監領未央殿令一人

六百石

長樂殿丞一人

注漢官曰荀菑苑官田所一人守之漢陽即天水永平十七年更

名

爾雅注秦有駢蹄苑

周官牧師掌牧地下

士四人

主牧放馬而養之

高紀至陽城收軍中馬騎四

年八月北貉燕人來致梟騎助漢八年三月令賈

人毋得乘騎馬

注乘駕車騎單騎

食貨志漢初天子不

能具醴駟武帝初衆庶街巷有馬天子為伐胡盛養
馬馬往來食長安者數萬匹卒掌者關中不足乃調
旁近郡縣官不給天子乃解乘輿馬 郗昂曰始皇
并寓內六萬騎之國馬盡歸秦漢武崇飾戰馬至四
十萬匹 匈奴傳票騎之出匈奴雖遠去漢馬少無
以復往 平準書發三河以西騎擊西羌 貨殖傳
塞之斥也唯橋桃以致馬千匹 晁錯傳益以邊郡
之良騎 趙充國傳軍馬一月之食度支田士一歲奏

罷騎兵省大費至四月草生發郡騎及屬國胡騎伉健
各千倅馬十二就草 揚雄賦方馳千駟校尉萬師
光武以所乘大驪馬賜李忠 寇恂拜河內太守委以
率厲士馬恂講兵肄射養馬三千匹 吳漢曰漁陽上
谷突騎天下所聞選烏桓突騎三千餘人 張堪遷謁者
使領騎七千匹詣大司馬吳漢軍 元初中虞詡說任
尚以兵法弱不攻強走不逐飛莫如罷數郡兵各令出
錢數千二十人共市一馬以萬騎之衆逐數千之虜追

尾掩截其道自窮 順帝永建元年五月丁丑詔幽并涼州刺史嚴勅障塞繕設屯備立秋之後簡習戎馬

漢九逸

西京雜記文帝自代還有良馬九匹皆天下駿足也名曰浮雲赤電絕羣逸驃紫燕騶綠螭龍子麟駒絕塵

號為九逸有來宜能御

選注引此一名飛燕騶

穆王八駿有驂

騶耳之號漢文九逸有浮雲絕塵之目

漢千里馬 四駿馬 滇池神馬 魏澤馬

賈捐之傳孝文時有獻千里馬者詔曰朕乘馬獨先安

之還馬與道里費詔曰朕不受獻也令四方毋獻

太宗卻走

馬

匈奴傳千里馬匈奴寶馬也 西域贊蒲梢龍文

魚目汗血之馬充於黃門注孟康曰四駿馬名 後循

吏傳建武十三年異國有獻名馬者日行千里

東觀記曰名都

王國獻名馬詔以馬駕鼓車

南蠻傳肅宗元和中蜀郡王追為益

州太守政化尤異有神馬四匹出滇池中

滇池周迴二百餘里源深

廣而未淺狹有似倒流 七命注

隴西神馬山有淵池龍馬所生

東京賦園林氏之

騶虞擾澤馬與騰黃

注山海經大封國有文馬騶身朱鬣名曰吉良乘之壽千歲瑞應圖

曰騰黃神馬一名吉光吉良騰黃一馬異名也

却走馬於糞車何惜騾褭與飛

兔 晉載記苻堅時大宛獻天馬千里駒皆汗血朱鬣

五色鳳膺麟身命羣臣作止馬詩而遣之 宋顏延之

賦帝軒陟位飛黃服皂后唐膺籙赤文候日漢道亨而

天驥呈才魏德懋而澤馬效質

謝莊傳河南獻舞馬詔羣臣為賦莊上其辭曰

輝大馭於國阜貢上衆於帝閑雙壁應範三封中國又作舞馮歌令樂府歌之 魏文帝以織驪馬遺吳 李

斯書乘織

宋志騰黃王者德御四方則出白馬朱鬣

為之馬

王者任賢良則見澤馬王者勞來百姓則至 蜀都賦
乘驥子服魚文玄黃異校結駟繽紛

漢余吾水馬 渥洼水天馬 中廬馬

武紀元狩二年夏馬生余吾水中

在朔方北

元鼎四年秋馬

生渥洼水中

注南陽新野有暴利長當武帝時遭刑屯田敦煌界數於此水旁見羣野馬中有奇

者與凡馬異來飲此水利長先作土人持勒絆於水旁後馬既玩習之代土人持勒絆收得其馬獻之欲神異此馬云從水中出 作寶鼎天馬之歌五年十一月詔曰渥洼水

出馬朕其御焉 禮樂志郊祀歌十九章第十章曰太

乙況天馬下沾赤汗沫流赭志倂儻精權奇籟浮雲晻
上馳體容與迤萬里今安匹龍為友元狩三年馬生渥

注水中作

按武紀乃云元鼎四年又云元狩二年夏馬生余吾水中亦非三年

後郡國

志南郡中廬

廬一作廬

注襄陽耆舊傳曰縣西山中有一道

漢時常有數百匹馬出其中馬形皆小似巴滇馬華

子云堯漢皆得馬者以皆火德正斗南方乘德而至

漢烏孫天馬 西極馬 宛天馬 西極天馬

歌 汗血馬

張騫傳元狩中得烏孫馬好名曰天馬及得宛汗血馬
益壯更名烏孫馬曰西極馬宛馬曰天馬初天子發書
易曰神馬當從西北來漢使少從率進孰於天子

隨使而出

外國者為少從進孰者但進成熟之言

言大宛有善馬在貳師城匿不肯

示漢使天子既好宛馬聞之甘心使壯士車令等持千金及金馬以請宛王貳師城善馬宛國饒漢物相與謀曰漢去我遠而鹽水中數有敗出其北有胡寇出其南乏水草又且往往而絕邑乏食者多漢使數百人為輩

來常乏食死者過半是安能致大軍乎且貳師馬宛寶馬也遂不肯予漢使怒妄言椎金馬而去宛中貴人怒曰漢使至輕我李廣利傳太初元年為貳師將軍發屬國六千騎及郡國數萬人期至貳師城取善馬益發戍甲卒十八萬七科適而拜習馬者二人為執驅馬校尉備破宛擇取善馬攻四十餘日迺出其馬令漢自擇之漢軍取其善馬數十匹中馬以下牝牡三千餘匹

西域傳宛別邑七十餘城多善馬汗血言其先天馬子

也張騫始為武帝言之遣使者持千金及金馬以請宛
善馬宛王以漢絕遠大兵不能至愛其寶馬不肯與漢
使妄言宛遂殺漢使

期門車令

取其材物於是天子遣貳師

將軍李廣利將兵前後十餘萬人伐宛連四年宛人斬
其王毋寡首獻馬三千匹漢軍乃還貳師斬宛王更立
貴人素遇漢善者名昧蔡為宛王後歲餘宛貴人以為
昧蔡調使我國遇屠相與共殺昧蔡立毋寡弟蟬封為
王遣子入侍宛王蟬封與漢約歲獻天馬二匹

孟康曰
言大宛

國有高山其上有馬不可得因取五色母馬置其下與集生駒皆汗血因號天馬云傳贊聞天馬

則通大宛武紀太初四年春貳師將軍李廣利斬大

宛王首獲汗血馬來作西極天馬之歌

應劭曰大宛舊有天馬蹋石汗

血汗從前肩膊出如血一日千里

禮樂志天馬徠從西極涉流沙九

夷服天馬徠出泉水虎脊兩化若鬼天馬徠歷無草徑

千里循東道天馬徠執徐時

太歲在辰曰執徐時歲在辰

將搖舉誰

與期天馬徠開遠門疎予身逝昆侖天馬徠龍之媒游

閭闔觀玉臺

上帝所居

天馬十太初四年誅宛王獲宛馬作

史記樂書得神馬渥洼水中為太一歌後伐大宛得

千里馬名蒲梢作天馬歌 馮奉世傳宣帝時至大宛

得名馬象龍而還

師古曰言馬形似龍者

後傳建初三年賜東

平王蒼及琅瑯王京書云并遺宛馬一匹血從前膊上

小孔中出常聞武帝歌天馬霑赤汗今親見其然也

又建

武二十六年南單于獻文馬十四匹二十八年北匈奴貢馬永平十七年耿恭檄烏孫遣使獻名馬

論

都賦馭宛馬鞭馱馱 晉武帝泰始六年九月大宛獻

汗血馬

漢移中監 平樂監

昭紀始元六年詔移中監蘇武前使匈奴云云注如淳

曰移園之中有馬廄也監官也

按詩注移
廄棟也

金日磾傳

拜為馬監 傅介子傳以平樂廄監使誅樓蘭王 後

漢禮震為淮陽王廄長馬融為河間王廄長史

漢宣德殿馬式 東門京銅馬法 相馬經

馬援傳字文淵好騎善別名馬建武二十年征交趾還
於交趾得駱越銅鼓乃鑄為馬式還上之因表曰夫行

天莫如龍行地莫如馬馬者甲兵之本國之大用安寧則以別尊卑之序有變則以濟遠近之難昔有騏驎一

日千里伯樂見之昭然不惑

伯樂秦穆公時善相馬者也桓寬鹽鐵論曰騏驎負

鹽車垂頭於太行之坂見伯樂噴而長鳴

近世有西河子與亦明相法子與

傳西河儀長孺長孺傳茂陵丁君都君都傳成紀楊子

阿臣嘗師事子阿受相馬骨法考之行事輒有效驗臣

愚以為傳聞不如親見視影不如察形今欲形之於生

馬則骨法雖備具又不可傳之於後孝武皇帝時善相

馬者東門京鑄作銅馬法獻之有詔立馬于魯班門外

更名魯班門曰金馬門臣謹依儀氏鞞

居奇反

中帛氏口

齒謝氏唇髻丁氏身中備此數家骨相以為法馬高三尺五寸圍四尺五寸有詔置宣德殿下以為名馬式馬注援銅馬相法曰水火欲分明水火在鼻兩孔間也上唇欲急而方口中欲紅而有光此馬千里領下欲深下唇欲緩牙欲前向牙欲去齒一寸則四百里牙劍鋒則千里目欲滿而澤腹欲充腩欲小季肋欲長懸薄欲厚

而緩懸薄股也腹下欲平滿汗溝欲深長而膝本欲起肘腋欲方蹄欲厚三寸堅如石 武紀注應劭曰永平

五年至長安取飛廉并銅馬置上西門外平樂館

東京賦平

樂都場天馬半漢注銅馬也

金馬式賦哂求市之三年無相肥於

一槩仰沛父以龍翥若驂驪而鹿超牛以石駝以銅作
略大宛為神蜀郡作鏡域中垂衡天下稱驥德頌駟牧
銅馬賦研精以範酌憲于心張戎容程國步狀赤文
之呈瑞方候日于堯庭 隋志五行類伯樂相馬經一

卷闕中銅馬法

崇文目周穆王相馬經三卷

文選張協七命秦青

不能識其衆尺九方堙不能覩其若滅

班固云良樂執能於相馭

注

相馬經曰夫法千里馬有三十六尺四寸

呂氏春秋

古之善相馬者寒風氏相口齒麻朝相頰女厲相目衛

忌相髀許鄙相脰投伐褐相胷脅管青臚脇

一作脊吻

陳悲

股脚秦牙相前贅君相後十人皆良工也所以相者不

同見馬之一徵也

若趙之王良秦之伯樂九方堙尤盡其妙

漢承華廐 高車廐

順帝紀漢安元年秋七月始置承華殿

東觀記曰時以遠近獻馬衆多

周廢充滿始置承華殿令秩六百石百官志注引古今注年月同

東京賦駙承華之

蒲梢

注殿名漢官儀有承華殿

杜篤傳建武十九年作高車殿

於長安

呂強傳諫曰中殿聚大僕之馬郡國志陳

留尉氏注陳留志曰北有澤澤有天子苑囿有秦樂殿

漢諸帝以養猛獸

漢駮驢殿

靈帝紀光和四年春正月初置駮驢殿丞領受郡國調

馬

注騾驥善馬也調謂調發

豪右辜權馬一匹至二百萬

魏乘黃廐

又見唐乘黃廐令

六典大僕有乘黃廐漢為未央廐魏改乘黃晉因之乘

黃古神馬因以為名乘黃一名飛黃

淮南子天下有道飛黃伏皂漢志

日出入詩曰警黃其何不徠下應劭曰警黃一名乘黃龍翼而馬身黃帝乘之而仙

魏都賦冀

馬填廐而駟駿注鄴城西下有乘黃廐魏書曹公列

鐵騎五千為十重陣精光曜日縱虎騎夾擊馬超大破

之鍾繇為司隸送馬二千餘匹以給軍陳王植於

武帝世得大宛紫騮馬一以獻文帝 黃伯仁龍馬頌
耳如剡筍目象明星雙璧似月蘭筋參情

晉典牧都尉 三廄

職官志太僕統左右中典牧都尉車府典牧乘黃驊騮

龍馬三廄令

郭展為太僕廄馬充多

渡江後太僕省故驊騮為門

下之職江左初侍御史置庫曹掌廄牧

晉有赤龍驥諸苑

六

典注魏置牧官都尉晉因之 梁書天監七年置太僕

卿統南牧左右牧龍廄內外廄

唐改龍廄為典廄

傳玄乘輿

馬賦文榮其德武曜其威 藉田賦龍驤騰驤而沛艾
載記慕容廆有駿馬曰赭白有奇相逸力雋比之於
鮑氏驄命鑄銅以圖其象親為銘贊鐫勒其旁置之薊
城東掖門 元魏太武太延二年冬於雲中置野馬苑
平朔方隴右以河西水草善以為牧地馬三百餘萬匹
索駝半之孝文復以河陽為牧場戎馬十萬匹歲自河
西徙牧并州漸南欲其習水土

馬之威無
如後魏

太和二年

龜茲獻龍馬十五年冬二千石考上上者賜乘黃馬一

匹

晉太元神馬

晉武帝太元十四年寧州刺史費統言晉寧郡滇池縣
兩神馬一白一黑盤戲河水之上 水經注滇池中有
神馬家馬交之則生駿駒日行五百里 典畧曰神馬
河之精

梁馬寶頌

又見
祥瑞

文苑英華梁簡文馬寶頌五月丁酉朔詔以馬寶示羣

臣太僕效官趣馬掌贊八麗四圍給役相趨暉煜金鑣
陸離寶勒鸞眄善鳴龍儀美稱總轡崑岑周非吾馭張
樂大野夏有慙德乾道應坤馬來度玉闕升玉臺千天
駟百龍媒永伏皐掃駒駘秣瑶粟委芳芻九夷款四表
清毗胥樂輿頌興 初學記黃章龍馬賦生河海之濱
涯被華文而朱翼

玉海卷一百四十八

欽定四庫全書

玉海卷一百四十九

宋 王應麟 撰

兵制

馬政

下

唐左右仗廄 六廄 六閑

百官志殿中省監一人少監二人丞二人有左右仗廄
左曰奔星右曰內駒兩仗內又有六廄一曰左飛二曰

右飛三曰左萬四曰右萬五曰東南內六曰西南內園苑有官馬坊每歲河隴羣牧進其良者以供御六閑馬以殿中監及尚乘主之武后萬歲通天元年置仗內六閑一曰飛龍二曰祥麟三曰鳳苑四曰鵷鸞五曰吉良六曰六羣亦號六廐以殿中丞檢校仗內閑廐以中官為內飛龍使聖厯中置閑廐使以殿中丞監承恩遇者為之分領殿中太僕之事而專掌輿輦牛馬自是宴游供奉殿中丞監皆不預聞開元初閑廐馬至萬餘匹

姜行本傳太宗選趙才乘六閑馬號飛騎紀高宗開
耀元年正月己亥減殿中太僕馬憲宗元和四年閏三
月己酉詔飛龍使減省內廄馬宣宗大中元年二月癸
未停飛龍馬粟通典翔麟鳳苑廄有蹠馬俯仰騰躍
皆合節朝會用樂則兼奏之舍元殿賦曰校人掌馬
天駟在閑望我鸞和陟彼南山

唐監牧籍帳

百官志太僕寺卿一人少卿二人掌廄牧輿輦之政總

乘黃典廡典牧車府四署及諸監牧行幸供五路屬車
凡監牧籍帳歲受而會之上駕部以議考課每歲孟秋
羣牧使以諸監之籍合為一以仲秋上於寺 屈突通
傳隋文帝命覆隴西牧簿得隱馬二萬匹

唐左右六閑 飛龍廡 祥麟廡 鳳苑廡

內外閑廡

百官志尚乘局奉御二人直長二人掌內外閑廡之馬
左右六閑一曰飛黃二曰吉良三曰龍媒四曰駒駉五

曰馱馱六曰天苑總十二閑凡外牧歲進良馬印以三
花飛鳳之字飛龍廐日以八馬列宮門之外號南衙立
仗馬仗下乃退大陳設則居樂縣之北與象相次龍朔
二年改曰奉駕局有習馭五百人掌調六閑之馬掌閑
五千人治六閑乘具司廩司庫各一人掌六閑藁秣出
納奉乘十八人習御馬 兵志以尚乘掌天子之御左
右六閑云云總十二閑為二廐一曰祥麟二曰鳳苑以
繫飼之其後禁中又增置飛龍廐

大和四年六月飛龍
廐東城羣牧請鑄印

天文志冀之北土馬牧之所蕃庶故天苑之象存焉
高宗時京師養廢馬萬匹張文瓘諫為減廢馬數千匹
崔日知遷殿中少監建言廢馬多請分牧隴右省關
畿芻調

唐八坊 四十八監 觀馬牧 八使監坊
七坊 羣牧著籍 六十五監 監牧使

百官志諸牧監監各一人副監各二人丞二人主簿一
人掌羣牧孳課凡馬五千為上監三千為中監不及為

下監馬牛之羣有牧長有尉馬之駑良皆著籍良馬稱左駑馬稱右三歲別羣孳生過分有賞死耗亦以率除之每歲孟秋羣牧使以諸監之籍合為一以仲秋上於寺歲終監牧使巡按以功過相除為考課注麟德中置八使分總監坊秦蘭原渭四州及河西之地凡監四十八南使有監十五西使有監十六北使有監七鹽州使有監八嵐州使有監二自京師西屬隴右有七馬坊置隴右三使領之又有沙苑樓煩天馬監沙苑監掌畜隴

右牛羊給宴祭及尚食所用

會要有東使九木云其後益置八監於鹽州三監於

嵐州而隴右三使領坊七

兵志云嵐州三監與此不同

同東使監九無隴右三使又不同

李峴傳有鳳翔七

馬坊押官

地理志同州馮翊有沙苑憲州本樓

太

煩監牧嵐州刺史領之貞元十五年別置監牧使

宗紀貞觀二十年八月庚辰次涇州丙戌踰隴山關次

瓦亭觀馬牧

太宗遣使齎金帛諸國市馬魏徵諫遂止

兵志馬者兵之用

也監牧所以蕃馬也其制始於近世

隋志隴右牧置總監副監丞以統諸

牧其驛騶牧及二十四軍馬牧每牧置儀同及尉六都督帥都督等員

唐之初起得突厥

馬二千匹又得隋馬三千於赤岸澤徙之隴右監牧之

制始於此其官領以太僕其屬有牧監副監監有丞有主簿直司團官牧尉排馬牧長羣頭有正有副歲課功進排馬又有掌閑調馬習上又有尚乘掌天子之御左右六閑一曰飛黃二曰吉良三曰龍媒四曰騊駼五曰馱馱六曰天苑總十二閑為二廄一曰祥麟二曰鳳苑以繫飼之其後禁中又增置飛龍廄初用太僕少卿張萬歲領羣牧自貞觀至麟德四十年間馬七十萬六千置八坊岐豳涇寧間地廣千里一曰保樂二曰甘露三

曰南普潤四曰北普潤五曰岐陽六曰太平七曰宜祿
八曰安定八坊之田千二百三十頃募民耕之以給芻
秣八坊之馬為四十八監

張說云置八使以董之
設四十八監以掌之

而馬

多地狹不能容又析八監列布河西豐曠之野凡馬五
千為上監三千為中監餘為下監監有左右因地為之
名其時天下以一縑易一馬萬歲掌馬久恩信行於隴
右後以太僕少卿鮮于匡俗檢校隴右牧監儀鳳中以
太僕少卿李思文檢校隴右諸牧監使監牧有使自此

始又有羣牧都使開廢使使皆置副

王腹為太僕少卿
隴右羣牧使

宗蕙知內外閑廐檢校隴右羣
牧大使押左右萬騎進封平王

又立四使南使十五西

使十六北使七東使九諸坊若涇川亭川缺水洛赤城

南使統之清泉溫泉西使統之烏氏北使統之木峽萬

福東使統之他皆失其傳其後益置八監於鹽州三監

於嵐州鹽州使八統白馬等坊嵐州使三統樓煩玄池

天池之監

元和十一年九月丙戌以樓
煩監馬百五十匹給昭義軍

凡征伐而發牧

馬先盡強壯不足則取其次錄色歲膚第印記主名送

軍以帳馱之數上於省自萬歲失職馬政頗廢永隆中

夏州牧馬失亡者十八萬四千九百九十景雲二年詔

羣牧歲出高品御史按察之開元初

二年九月

國馬益耗太

常少卿姜晦乃請以空名告身市馬於六胡州率三十

匹酬一游擊將軍命王毛仲領內外閑廐馬稍稍復始

二十四萬至十三年乃四十三萬

王毛仲為輔國大將軍內外閑廐知監使

持法不避權貴為可喜事兩營萬騎及閑廐官吏畏之無敢犯雖官田草萊樵斂不敢欺於牧事尤力婉息不訾初監馬二十四萬後至四十三萬牛羊皆數倍時筒麥首箱二十九百頃以槩冬後從東封取牧馬數萬匹

每色一隊相間如錦繡天子才之十
三年十一月癸巳加毛仲儀同三司
其後突厥款塞玄

宗厚撫之歲許朔方軍西受降城為互市以金帛市馬

於河東朔方隴右牧之既雜胡種馬乃益壯

王忠嗣請徙朔方河

東騎以實軍迄天寶末益滋息天寶八載詔哥舒翰以朔方河東羣牧兵攻石堡

天寶後諸軍

戰馬動以萬計王侯將相外戚牛駝羊馬之牧布諸道

百倍於縣官皆以邑封號名為印自別將校亦備私馬

議者謂秦漢以來唐馬最盛遂弱西北蕃十一載詔二

京旁五百里勿置私牧十三載

六月一日

隴右羣牧都使奏

馬牛駝羊總六十萬五千六百而馬三十二萬五千七

百

王忠嗣在朔方至互市高馬直以空虜資

肅宗收兵至彭原抵平涼

天寶十五

載六月辛丑

蒐監牧及私羣得馬數萬軍遂振

陸贄曰諸牧有馬肅宗資

以復興

後吐蕃陷隴右苑牧畜馬皆沒乾元後回紇歲入

馬取繒

郭子儀傳回紇赤心請市馬萬匹有司以財乏止市千匹子儀以中原須馬請納一歲俸佐馬

直不聽

代宗下制禁馬出城者建中元年市關輔馬三萬

實內廩貞元三年詔禁大馬出蒲潼武關者元和十年

伐蔡命中使以絹二萬市馬河曲其始置四十八監據

隴西金城平涼天水幅員廣千里繇京度隴置八坊

會要

自貞觀至麟德馬四十萬匹皆在河隴間開元中尚有二十七萬雜以牛羊等不啻百萬置八使四十八監自長安至隴西置七馬坊為會計所都領至德以後西戎陷隴右國馬盡沒牧監使與七坊盡廢其地利歸節度使志云給貧民餘見後六典駕部監牧六十有五皆分使以統之

南使十五監西使十六北使七東使九鹽州使八嵐州

使三

舊志亦云六十有五

開元十三年張說為隴右羣牧使頌

曰周禮校人掌王馬之政天子十二閑馬六種閑為一廐馬二百一十六應乾之策也六廐成校五良一駑是

之謂小備校有左右閑成十二合月之道也駕馬三良馬之數凡三千四百五十六是之謂大備秦并一海內六萬騎之國馬盡歸之帝家則周制陋矣漢孝武當文景儉約之積雄衛霍張皇之師勒兵塞上廐馬有四十萬匹及東漢晉魏國馬陵夷不可復逮武帝時矣大唐接周隋亂離之後承天下戰陣之弊鳩括殘燼僅得牝牡三千從赤岸澤徙之隴右始命太僕張萬歲葺其政焉而奕世載德纂修其緒肇自貞觀成于麟德四十年

間馬至七十萬六千匹置八使以董之設四十八監以掌之跨隴西金城平涼天水四郡之地幅員千里猶為隘狹更析八監布于河曲豐曠之野乃能容之于斯之時天下以一縑易一馬秦漢之盛未始聞也張氏中廢馬官亂職開元皇帝既登大寶水瑞感而河龍出星精應而天駟下二年春乃更以王毛仲主之觀夫春祭馬祖夏祭先牧秋祭馬社冬祭馬步敬其本也日中而出日中而入焚原燎牧除蓐疊廐時其事也潔泉美薦庠

涼棧濕翹足而陸交頸相靡宣其性也攻駒教馳講馭
臧僕刻之剔之羈之策之就其才也不反其性故節樂
如舞之心自生不窮其才故竊轡詭銜之態不作爾乃
舉其神異則駒駘騷乘黃茲白別其種類則研蹄繁
鬣小領遠志龍騄戎驥差其毛物則蒼白驪黃騂紫驕
皇騅駉駉駉駉駉駉駉駉駉駉駉駉駉駉駉駉駉駉駉
狼尾魚目以至宗廟齊豪戎事齊力田獵齊足罔不畢
有元年牧馬二十四萬十三年乃四十三萬匹皇帝封

岱羽衛咸備大駕百里煙塵一色行如動地止若屯雲
百蠻震聳四方抃躍頌曰皇天考牧兮聖之君四十三
萬兮馬為羣塹汧渭兮垣隴阪飛黃阜兮昆蹄苑山崆
峒兮水鳴咽泉噴玉兮草汗血天王駕兮仗黃麾大僕
駟兮展輅儀舞月駟兮蹀雲螭神侔儻兮態權奇頌皇
靈兮篆石鼓萬斯年兮羣玉府 開元二十五年曹曹
參軍却昂撰岐邠涇寧四州八坊碑頌
書目一卷 序云張萬歲
傍隴右字之四十年間成七十萬六千匹開元初唯得

二十四萬匹至十九年復成四十四萬匹上耕藉之明年命邠公典馬政公召入咨元祐作小司空兼牧圉匪燒匪剔斯馬斯才先是國家以岐山近甸豳土晚寒寧州壤甘涇水流惡澤茂豐草地平鮮原當古公走馬之郊接非子大丘之埜度其四境分署八坊其五在岐餘在三郡保樂第一甘露第二保樂者隋石門馬坊也甘露先置在九成苑外有詔令新保樂徙甘露云云

先是國家

以岐豳寧涇四境分置八坊岐州有其五三州各有一

折衝果毅蘇忠等八人各

主一坊苑總監韋績統之八坊有田千二百三十餘頃
分為十屯皇朝知鳳州廖康上此碑請推行其法 會
要貞觀十五年尚乘奉御張萬歲為太僕少卿領羣牧
不入衙麟德三年正月少卿鮮于匡俗檢校隴右羣牧
雖入衙未置使儀鳳三年十月少卿李思文檢校隴右
諸牧監使始有使號其後蘇幹等二十九人為之元和
十二年十月開廩使張茂宗奏取麟游岐陽牧地三百
四十七頃盡歸國家侍御史范傳式覆實

志云盡牧岐
陽坊地民失

業者甚衆 茂宗傳至德時隴右監及七廐皆廢而開
廐私其地入寶應初始以其地給貧民茂宗奏悉收其
賦長慶初盡以其地還民 志云
監牧使與坊皆廢故地以給貧民 會要武德二年正

月於鄜州南故馬坊置坊州

地理志坊州周天和中
元皇帝為數州刺史置

馬坊高祖
因以名州

高宗紀永徽二年九月癸卯以同州

苦泉牧地賜民

會要天寶六載十二月九姓堅

昆及室韋獻馬六千匹於西受降城納之

德宗

紀貞元三年八月庚戌禁大馬出蒲潼武關

藝文志

藝術有韓幹畫相馬圖玄宗試馬圖

漢惠紀師古注

騎常所養馬并其人使行充騎若今武馬陸贄奏議
代朔邠靈之騎士自昔之精騎也

唐乘黃令

百官志乘黃署令一人從七品下丞一人從八品下掌
天子車路與馴馭之法管子對桓公云昔之受命
者龜龍假至河出圖洛出書地出乘黃注乘黃神
馬名坤利牝馬之貞故從地出乘黃渥洼神馬之
比乘黃古神馬名亦曰飛黃背有角日行萬里淮

南子云天下有道飛黃伏皂後漢有未央殿長樂殿丞魏改為乘黃殿晉因之宋太常屬官有乘黃令一人掌乘輿金根車及安車追鋒諸車齊職儀云乘黃獸名也龍翼馬身黃帝乘之而仙因以名殿乘黃令品第七秩四百石梁太常屬官有乘黃丞令陳因之後魏有乘黃令丞北齊掌諸輦輅隋太僕寺統乘黃局令丞唐因之黃帝時神馬生澤中一曰吉光又曰吉良飛龍有吉良殿自此也貞觀十三年三月吉良殿產白馬

朱駿 山海經曰犬戎之國有文馬縞身朱鬣目若黃

金名曰吉彊乘之壽千歲

彊或作良

唐東宮羣牧

百官志東宮官僕寺僕一人丞一人主簿一人掌廄牧
廄牧署令一人掌車馬閑廄牧畜皇太子出則率典乘
先期習路馬率駕士馭車乘凡羣牧隸東宮者皆受其
職事典乘四人翼馭十人駕士十五人掌閑六百人太
僕寺屬有東宮九牧監丞二人錄事一人掌牧養馬與

皇太子之用

馬牧使有丞以下
惠帝紀有太子御驂乘

唐監牧

元和志貞觀中自京師東赤岸澤移馬牧於秦渭二州之北會州之南蘭州狄道縣之西置監牧使以掌其事仍以原州刺史為都監牧使以管四使南使在原州西南一百八十里西使在臨洮軍西二百二十里北使寄理原州城內東使寄理原州城內天寶中諸使共有五十監

南使管十八監
西使管十六監
北使管七監
東使管九監

監牧地東西約

六百里南北約四百里天寶十三年諸監見在馬總三十一萬九千三百八十七匹內一十三萬五千五百九十八匹課馬沙苑一名沙阜在馮翊縣南十二里東西八十里南北三十里宜六畜置沙苑監 紀武德六年十一月辛卯獵于沙苑 唐世牧地與馬性相宜西起隴右金城平涼天水外暨河曲之野內則岐幽涇寧東接銀夏又東至樓煩此唐養馬之地也

唐中御諸廄

高宗紀咸亨元年九月甲戌以旱減中御諸廄馬儀鳳
元年八月庚子損食粟馬 文宗紀大和八年五月已
巳飛龍神駒中廄火

唐骨利幹十驥

回鶻傳骨利幹處海北近日出處也產良馬者似橐駝
筋骼壯大日中馳數百里貞觀二十一年八月十七日入貢

舊史貞觀二十一年八月辛未骨利幹國遣使貢名馬

遣雲麾將軍康蘇密勞答

以其地為玄闕州

丙戌

其大酋俟斤因使者康蘇密獻馬

百匹帝取其異者號十驥皆為美名一曰騰霜白

會要作騰

雲白

二曰皎雪驄三曰凝露驄

露會要作霜

四曰懸光驄五曰

決波駒六曰飛霞驃七曰發電赤八曰流金馭九曰翔
麟紫十曰奔虹赤上乃敘其事曰骨利幹獻馬十匹特
異常倫觀其骨大筋羸髻高臆濶眼如懸鏡頭若側埽
腿像鹿而加圓頸比鳳而增細後橋之下促骨起而成
峯側韉之間長肋密而如辦耳根纖銳杉竹難方尾本
高羸掘埽非擬腹平臙小自勁驅馳之力鼻大喘踈不

乏往來之氣殊毛共捭壯花藥之交林異色同羣似雲霞之間彩骨法異而應圖工藝奇而絕象方驗天池大

宛顧其驚蹇者歟

會要貞觀二十一年八月十七日骨利幹遣使朝貢獻良馬一百匹其中

十匹尤駿太宗奇之各製其名曰十驥骨利幹馬無印惟以耳鼻為記先是屬賓疏勒獻馬

武

德元年十二月乙亥豐州總管張長慈獻騾耳馬二

匹 武德七年康國獻名馬 永徽二年閏八月吐谷

渾獻駿馬命還之 開元十二年新羅獻果下馬二

詳見

後

天寶六載堅昆室韋獻馬六千命西受降城納之

天寶中大宛進汗血馬六匹曰紅紫青黃丁香桃花
叱撥上乃改名紅玉紫玉平山凌雲飛香百花輦命圖

於瑤光殿

秦再思
紀異錄

金石錄有唐昭陵六馬贊歐陽

詢書殷仲容書降王名附太宗琢石象平生征伐所
乘六馬為贊刻昭陵 酉陽雜俎曰決波駒走歷門

三限不躋上尤惜之隋內庫有交臂玉猿二臂相貫
如連環特表其轡 太宗有詠飲馬詩 太宗拳毛

騮

唐青海驄 黃驄曲

舊書吐谷渾有青海周圍八九百里中有小山至冬放牝馬於其上生駒號龍種嘗得波斯馬放入海中因生

驄駒日行千里故代稱青海驄馬

隋置馬牧於青海以求龍種 隴西神馬

山有淵池龍馬所生 天寶中隴右奏有馬生龍駒

吐谷渾傳得波斯馬牧於

海生驄駒日步千里 樂志太宗破竇建德乘馬名黃

驄驃命樂工製黃驄疊曲宮調也

唐龍陂監 臨漢監 銀川監

兵志元和十三年以蔡州牧地為龍陂監

王式傳懿宗時發龍陂監

牧馬以討仇甫

十四年置臨漢監於襄州牧馬二千二百

表元和十

四年山南東道節度增領臨漢監牧使大和七年罷一本云元和十四年八月甲寅置臨漢監於襄州穀城

孟簡兼使職

太和七年

正月

裴度奏停臨漢監

度為山南東道節度白罷元和和

所置臨漢監收千馬納之校以善田四百頃還襄人

十一月度支鹽鐵使言銀州

水甘草豐請詔刺史劉源市馬三千河西置銀州監以

源為使開成二年

七月

源奏銀州馬已七千若水草乏則

徙牧綏州境今綏南二百里四隅險絕四路不能通以

數千人守要畜牧無他患乃以隸銀州監

會要

又實錄

貞元十三年福建觀察使柳冕奏置萬安監牧於泉州

索部內馬五千七百匹以為監牧之資人大擾二十一

年四月丙寅罷之

實錄閩濟奏罷

冕奏閩中本南朝

畜牧地可息羊馬置牧區於東越名

萬安監又置五區於泉州索部內馬五千七百匹畜之民怨苦

元和十四年五月

已於

淮南置臨海監節度使兼之太和二年十月廢代宗

下制禁馬出城者建中元年市關輔馬三萬實內殿貞

元三年詔禁大馬出蒲潼武關者元和十年伐蔡命中

使以絹二萬市馬河曲

乾德飛龍院

乾德五年六月辛巳六年八月七日戊午幸飛龍院

左右

二院九月巳酉十月巳未又幸

自後七
臨幸

開寶二年正月巳

丑幸賜從臣名馬仍令符彥卿十二人自擇之十月二十日戊戌幸賜近臣名馬四年二月乙未幸賜從臣馬各一匹太平興國二年六月二十六日乙卯幸賜從臣馬各一匹三年六月二十九日壬午幸宴近臣從官雍

熙二年九月淳化三年九月賜近臣馬

凡四臨幸

河南府

洛陽監舊曰飛龍院興國五年改牧龍坊景德四年為

監國初止有左右飛龍二院以左右飛龍使各二人

分掌之諸州監牧多廢太祖始置養馬二務又興葺舊

馬務四遣使歲市邊州馬開廢始備太宗平太原觀兵

范陽得汾晉燕冀之馬凡四萬二千餘匹國馬增多詔

於景陽門外作四廄名天駟監內廄充牴始分置諸州

牧養楊侃皇畿賦延廄之設是名天駟伐大宛以新

求涉渥洼而遠致羣驅八駿隊數十驥 建隆二年十

月戊戌禁邊民出塞盜馬以前所盜還之由是夷狄畏

慕不敢內侮

初五代募民盜戎人馬以補戰騎

太平興國天駟監 天殿院 四殿 雍熙天

殿坊

興國四年正月建養馬務五年正月壬午景陽門外新作四殿成詔以為天駟監左右各二改左右飛龍院為左右天殿院使為天殿使甲申改閑殿使為崇儀使

云一

六年駕幸監改天慶院名

漢志房為天府曰天駟

六年十月丙寅幸天駟左監

賜從臣馬本監官吏將士緡帛雍熙二年閏九月甲申

幸天駟監閱馬詔羣臣自選名馬既而帝親選賜之歷

四監而還淳化三年九月甲寅幸天駟監閱馬賜從臣

馬各一匹景德元年正月癸巳幸天駟左監賜從臣

馬三年九月甲寅幸左監賜從臣馬官吏將士緡帛有

差祥符三年八月庚申幸左第一監賜從臣馬熙寧

三年三月六日詔以左右天駟四監併作左右兩監

雍熙二年十月置天廐坊咸平元年併入比務分左右
二坊與天駟皆分隸於左右驂驥院 熙寧八年二月

十一日罷天廐坊

二坊有倉
有倉場

端拱元年四月司業孔

維請禁原蠶以蕃廐馬淳化二年十二月丁丑命
國人取善馬數十匹於便殿設阜棧教以芻秣帝
以其法諭輔臣頒于諸軍復以馬醫方書賜近臣
五年五月雄州馬商獻良馬五閱試皆驥也留內
閑厚賜之

太平興國牧龍坊 景德諸監

太平興國五年改河南飛龍院大名養馬務洺州養馬務衛州二監管城馬務同州馬監相州馬坊澶州馬務

白馬龍馬監並為牧龍坊

一本云興國四年太宗閱軍戰騎多缺詔市馬十七萬匹

是歲平太原觀兵幽州得汾晉燕薊馬四萬二千餘匹內阜增多始分置諸州牧養置牧龍八坊大名置于興國三年洺州置于建隆三年衛相州則周顯德置而建隆增茸澶州則建隆初置於濮而開寶八年徙之同州則建隆初置咸平六年十二月賜牧龍坊兵毛裘以阜紬表之被毳似胡服故也景德二年七月四日庚戌羣牧使趙安仁

言按唐六典凡馬有左右監以土地為名諸路馬棚六

百八十七欲改牧龍坊為監仍鑄印給之於是河南為

洛陽監天雄軍大名為大名監

二年五月分大名為二坊七月以為二監祥符

二年又置第三監於洺州境

洺州為廣平監

祥符三年閏三月增置第二監景祐二年廢其

一衛州為淇水監

後分為二熙寧七年四月合為一元祐六年閏八月十八日復置第二監

鄭州為廣武監

初分為二祥符二年改原武監合為一景德二年二月以鄭州務馬於京城置

坊養之同州為沙苑監

咸平六年十一月戊子分為二每監牧馬四千五百匹

相州

為安陽監澶州曰鎮寧

乾興元年十二月廢鎮寧監

滑州舊龍馬監

曰靈昌

天禧三年以河決而廢

若乃邢州之安國置于祥符二年

之八月至景祐二年春而廢鄆州之東平置於祥符元年之十一月至熙寧七年二月而廢中牟之淳澤祥符四年置而廢於乾興元年之四月許州之單鎮祥符六年七月置而再置再廢於天聖五年十一月戊戌而改為雜大馬監於元祐六年閏八月同州之病馬務景德元年以沙苑監兼掌至天聖二年別命使臣掌之京城開遠門外之上下監則又置於祥符四年之十一月而

裁減兵校於熙寧八年之三月內外馬數以元豐七年

五月丙寅中書省所奏熙寧二年之數考之凡十五萬

三千六百三十四

元豐六年上批且於畿內置十監

獨以左右驂驥院

六坊監言之祥符五年四月之數凡萬七千匹費芻粟

四百萬

止留二千餘出牧淳澤

祥符三年二月立養馬務賞罰

條格四年三月丙戌幸洛陽監賜從臣馬五年七月詔

在京養馬七千匹左院坊監千五百三十

御馬二百八十七

右

亦如之

御馬二百

牧養監千五百淳澤監三千五百六年二

月丁亥樞使陳堯叟言洛陽監馬五千匹頗費芻粟上
曰馬數及萬匹可止王旦曰聽民間養馬有須以本直
市之猶外廩耳先是二年二月羣牧使請同州沙苑
改充孳生監詔經度四時牧放地慶厯五年閏五月羣
牧言沙苑監地萬一千四百六十餘頃馬僅一千八百
餘匹治平四年六月七日以隸陝西提舉監牧司熙寧
八年閏四月五日復屬羣牧而北京元城等八監並廢
元符二年閏九月沙苑復屬陝西許州長葛馬監皇

祐元年四月二十五日命守臣兼監牧 景德四年

八月選朝臣內侍各二人點視諸州馬數五年三月

帝謂所奏少去歲二萬天禧元年八月以馬數倍多

選留上第餘定估貨之 景祐三年四月再定諸州

買馬額

自秦川蕃部馬萬八百七十四匹省馬五百至
青嵐蕃馬不立額省馬二百五十匹自四尺

七寸至四尺
一寸凡六等

羣牧馬數歲較耗登諸蕃馬月奏其數

熙寧六年七月羣牧司有券馬錢元豐三年二月

詔三司歲以十萬償之四月二十一日罷羣牧行司

復置提舉買馬監牧司 河北七監歲耗緡錢百

萬景祐元年正月庚辰漕臣王沿奏罷廣平二監
以牧地賦民 丁度為使言天聖中牧馬至十餘
萬其後廢八監陝西河東歲市二萬二百猶能補
京圻塞下之缺自用兵數年市馬特三之一請下
令河東有蓄一戰馬免二丁仍不升戶等 淳化

五年十二月詔閱視通利軍等數十處牧馬草地

圖

雍熙驢院

會要左右飛龍院興國五年改名天廡院雍熙二年十

月丙辰改為左右驢院左右各領天駟二監天廡一

坊

舊制國馬之政皆驢
驢二院監官專之

雍熙三年二月乙丑幸新驢

驢院

二年二月二
十七日幸

咸平二年九月癸卯幸賜從臣馬

祥符元年九月乙亥幸右驢院賜從臣馬五年四月

羣牧使言左右驢院六坊監飼馬萬七千匹費芻粟

四百萬請止留二千餘悉遣就淳澤監放牧歲省芻粟

三百餘萬 熙寧九年移鞍轡庫於左驕驥院 元豐

二年七月二十一日丁亥以舊養牛院擊鞠院御厨營

地增修左驕驥院 建炎三年四月十三日詔驕驥院

官吏減半紹興二十六年八月二十一日詔驕驥院左

右教駿四指揮各以百人為額

在京共二千九百四十八人紹興八年十月十

日以五十

人為額

至道崇政殿閱馬

至道中

元

御崇政殿閱驕驥院所進馬命馳驟於庭親

選其良以充尚乘因謂侍臣曰馬之良駑在人鑒別掌
廐牧者但能辨年齒肥瘠之狀至於駿駟未必盡識朕
視馬多矣亦猶選練士卒雖曰閱千萬其翹楚者材質
自異固可知矣

咸平羣牧司

咸平三年九月置羣牧司總內外馬政自騏驎院而下

聽命焉庚寅以樞密直學士陳堯叟為制置羣牧使

景德

二年以王曉為判官
四年九月增一員

景德四年八月堯叟以樞庭兼領

因以制置使為羣牧使又以待制以上為同羣牧使

二年

七月以內侍閻承翰為副使 同羣牧使 皇祐元年六月己丑梁適至至和元年七月呂公弼

祥符二

年八月內侍張繼能為都監熙寧九年九月十七日詔

以樞密都承旨兼使副承旨兼副使 志羣牧司總天

下馬政其屬有左右騏驎院分領天駟監天廐坊其畜

病馬有牧養上下監牧兵校長有提舉指揮使諸監在

外者知州通判兼領各據芻牧列棚井課士卒春夏出

牧秋冬入廐孳息有賞耗亡有罰條教甚備 咸平六

年四月乙丑令河北轉運副使兼羣牧事其後歲遣判官循行諸監取孳生駒二歲以上點印之歲約八千餘匹凡飼馬兵校萬六千三十八人坊監諸軍馬二十餘萬匹京城歲市草六十六萬六千餘束料六萬二千餘石諸州之費不與焉左右驕驥院六坊監止留三千餘三月出牧秋冬而入御馬惟備用者在京師牧地擇水草之善者諸坊監總四萬四千四百餘頃諸班軍又三萬九百餘頃凡市馬之處自府州至永康凡十九皆置

每監歲定牝馬二千牡馬四百歲約孳生駒四百以為

定數 神宗治平四年八月上謂樞臣文彥博曰羣牧

使判官不久任無以成效令中書擇使彥博舉判官二

十七日

一本云十一月辛亥

元豐五年五月朔官制行廢羣牧

司以職事歸太僕寺建炎三年四月併太僕于駕部

景德羣牧故事 監牧議 羣牧制置使

景德二年七月庚戌改諸州牧龍坊為監

從羣牧趙安仁之言也

見前羣牧司

是月丙辰羣牧判官著作佐郎王晦叔

一名上

言馬政之設禮經具存國家疇咨近臣特建使職冀崇
舊典用教羣騶將臻魯頌之斯才式賴康侯之蕃庶小
臣是敢采摭舊聞次其類例上自中古下暨皇家生息
之登耗蓄字之訓令至於陰陽拘忌針烙方書九龍十
驥之名稱東門西河之骨法舉其會要以示紀綱纂成
六卷目曰羣牧故事望藏本司備詳閱上覽之嘉其詳
博詔獎之

書目三卷
國史志六卷

四年八月乙巳知密院陳堯叟

兼羣牧制置使

時內侍閤承翰為都監堯叟
辭不許自後常以樞臣掌之

堯叟著監

牧議以獻

述馬政之重

勒石大名監九月丁亥又置判官一

員明道二年五月十二日罷羣牧制置使景祐二年十月癸亥復置止以副樞兼寶元二年五月二十三日又罷而復置慶厯三年六月戊辰復以樞使王貽永兼

呂公弼主任羣牧使治平二年三月與教駿兵七人

葉清臣傳皇祐元年春詔問戰馬乏絕何策可使足用臣在三司陳監牧之弊占良田九萬餘頃歲費錢百萬緡天閑之數才三四萬急有征調一不可用莫若賦馬

於河北東陝西京東西五路上戶一馬中戶二戶一馬
養馬者復其一丁則坐致戰馬二十萬

祥符牧馬法

元年正月二十一日制置使言副指揮使朱峭定牧馬
法命鏤板摹賜內外坊監

祥符馬籍定式

祥符元年正月壬午羣牧使言定牧馬法頒下坊監命
刻印給之六月又言內外廐牧月供馬籍未有懲勸之

法令為定式付之違者有罰從之 二年九月詔騏驎

院及諸坊監馬數自今旬奏月比省日奏之繁也 元豐七年

五月丙寅二十命兵部比較內外馬數

祥符牧養監

祥符四年十一月置牧養上下監在京城西開遠門外

馬病者選送

天駟騏驎牧養監有倉場以受芻粟

熙寧八年三月裁減

兵員 咸平元年十一月戊辰置估馬司在建隆

坊納諸州所市馬 景德元年九月詔估馬司收

蕃部省馬以良駑中分與兩騏驎院 嘉祐五年

八月甲申置陝西鹽馬司七年置買馬司於原渭

德順三州

明道端明殿閱馬

明道二年正月乙未御端明殿閱左右騏驎院馬賜荆
王二匹宗室輔臣等各一匹

慶厯宮駿坊

慶厯八年五月癸亥以羣牧司新修宗室馬廄為宮駿

坊

嘉祐陝西監牧

雍熙端拱於河東陝西河西川陝京東市馬自趙德明

據河西其收市唯麟府涇原儀渭秦階環岢嵐火山保

安保德其後止九場

環慶延渭原秦
階文州鎮戎軍

咸平六年二月二

日涇原請廢鎮戎市馬務併於平涼上曰買馬之法不

惟蕃國馬亦欲招來蕃部以伺敵情不許七月詔陝西

振武兵如河東廣銳例立社馬官給直以市之天聖初

猶得蕃部省馬總三萬四千九百餘匹

其從他州皆廢
惟秦州存每五

十匹至百
匹為一券

慶歷二年三月甲子詔河北沿邊置場市馬

六月命河北籍民馬有須則市之五年七月以內府帛
二十萬於崑崙市馬六年五月丙申詔陝西夏安期招
蕃部入中戰馬十二月詔保安鎮戎歲市二千匹至和
元年十二月羣牧司請市於環保安德順三年八月以
三司帛三萬市於府州然馬政不舉言者請更革嘉祐
五年七月壬子命翰林學士吳奎戶部副使吳中復度

支判官王安石右正言王陶同相度牧馬利害八月奎
等言國馬盛衰以所任得失陝西馬價多出解鹽三司
銀帛許於漕司易錢委運副薛向擇隙地置監孳養西
方不失土性一利也未耕之地不傷民二利也因向之
才久任三利也河北諸監可存者易以西馬可廢者賦
民收其入以充費甲申命向專領本路監牧及買馬事
一云鹽馬司於原渭德順置場同州沙苑及鳳翔牧地
使臣委向保薦以解鹽交引募蕃商歲可得良馬八千
餘三千給邊騎
五十八羣牧

歐陽修請按左右廂監牧又言河東寄

嵐間唐樓煩監地可置一監及京西唐汝間訪草地置
監牧又請遣羣牧司禮賓院官至邊訪蕃部券馬利害
從之七年原渭德順置買馬司三年共萬七千一百匹
八年秦州永寧寨復置坊 治平四年六月十九日命
劉航等於河北河東陝西度地置監十一月十四日以
陝西無在官牧地不置而河東於太原交城縣置監
知太原請於
交城縣置監先是崔台符按汾州得牧地三千二百頃
明年春移沙苑馬五百往牧 熙寧元年八月命河東

唐介

諸路每五千匹赴衛州監牧二年二月二十二日命王
存顧臨閱羣牧之籍具河南北兩監牧司牧地頃畝以
聞 元豐二年二月二十九日岷州康川荔川閭川寨
通遠軍寨置牧養十監五年七月命王君萬掌熙河新
置監牧六年六月一日命於畿內置十監令近臣經度
制置七月減歲額增直以市良者十年九月七日御延
和殿閱經制牧馬司進諸路馬并左第一監馬駒十二
月詔陝西買馬隸經制熙河邊防司

熙寧三年十二月
詔三年買三萬匹

八年八月二十六日罷畿內新置監 元祐元年二月
十六日命郭茂恂度陝西河東置監復七監畿內十監
甫二年而廢牧地尚三千餘頃紹聖元年七月二
十七日復置孳生監 咸平五年二月甲午審刑
院定秦州私販馬條例 熙寧元年十月乙卯出
奉宸庫珠二千三百四十萬付河北四榷場鬻之
以市馬 川秦八場額市馬萬二千九百九十四
匹

熙寧監牧使 孳生監

熙寧元年密院言舊以左右騏驎院總司國馬景德中
增置羣牧使副都監判官領廩牧之政使領不躬自巡
察馬不蕃息欲分置官局乃詔河南北分置監牧使都
監各一員勿隸羣牧九月十六日乙酉命劉航為河南
監牧使崔台符為河北監牧使以河南北馬監並為孳
生監

志馬之孳生係大名府洺衛相州七監

諸馬監分屬兩使久任以責

成效

取總牧地河南六監三萬三千頃河北六監二萬三千頃

仍專屬制置使

置司河北

於大名河南於
河中後徙西京

後又隸密院二年天下應在馬凡十五

萬三千六百三十四三年十二月詔原渭德順軍自今

三年買馬三萬匹八年二月行戶馬法從曾孝寬之請

也四月庚寅罷河南北監牧惟存沙苑一監隸羣牧司

餘北京元城等八監並廢九年五月開封界增六千匹

為額國朝馬政內有騏驎兩院天駟四監天廐二坊及

上下監外則河南北為監者十二皆掌於羣牧司至是

議廢監元絳等校利害上之中書密院言河南北十二

監起熙寧二年至五年出馬一千六百四十匹可給騎兵者二百六十四而已於是廢以善馬隸諸監元豐三

年二月壬戌立諸路戶馬法

初行于京畿王拱辰請行於諸路詔民間養馬稍復

寓兵於農之意

六月丁巳諸路上其數而戶馬更為保馬七年

二月八日詔京東西每保養五十匹置官提舉五月二十六日詔已養戶馬免保馬八年四月八日罷戶馬寬保馬限法

熙寧茶馬司

志都大提舉茶馬司凡市馬於蕃夷以茶易之 熙寧

七年命成都經畫充秦鳳熙河路博馬李杞蒲宗閔提

舉歲買二萬匹

成都記熙寧七年詔李杞蒲宗閔經畫川茶充秦鳳熙河路博馬杞於秦州宗

閔於成都置司後改名都大提舉茶馬事

元豐四年八月十八日茶馬并為

一司郭茂恂為之增額為二萬匹

一本六年郭茂恂言茶司不兼買馬遂倚

法以審馬乞併茶場買馬為一司

六年六月七日詔復分為二八年九

月十八日又命合治

諜名山蒙頂之珍訪騷耳象龍之駿

紹興七年閏十

月復置西和三千六百匹階州五百則二十七年二月

省府所奏歲額也舊制川秦各置司秦司事畢乃歸川
司措置茶幣乾道四年宣撫虞允文請於鳳州河池置
秦司既近宕昌可以察弊從之 歲給三衙馬三千三
百五十歲額共一萬九百六十六匹

熙寧羣牧編勅

治平四年十二月辛丑

一本二十七日

命羣牧判官崔台符劉

航刪修羣牧司勅令

一本云條貴勅令

以唐令及本朝故事增

損刪定熙寧三年五月庚戌

一本云二十一日

羣牧判官王誨

上羣牧司編敕十三卷

一本云馬條貫十卷一作十三卷

行之

元祐三馬圖

元祐初禽鬼章青宜結百官皆賀時西域貢馬首高八尺龍顧而鳳膺虎脊而豹章出東華門入天駟監振鬣長鳴萬馬皆瘖父老縱觀以為未始見也上方恭默思道八駿在廷未嘗一顧明年羌溫溪心有良馬不敢進請於邊吏願以餽太師文彥博詔許之蔣之奇為熙河帥西蕃有貢駿馬汗血者有司以非入貢歲月留其馬

於邊於時兵革不用海內小康馬則不過矣而人稍安
蘇軾請於李公麟畫三駿馬之狀而使鬼章青宜結效
之為贊曰八尺龍神超遙若將西燕西瑤帝念民乃下
招爾歸雲逝房妖 九馬圖曹將軍霸所繪杜甫作詩
拳毛師子二駿在焉贊曰姚宋廟堂李郭治兵帝下毛
龍以馭羣英

建炎御馬院

建炎三年六月五日詔御馬院草料依升陽宮例四年

七月十八日詔驕驢院差教駿五十人赴御馬院養馬
以二百五十人為額紹興十三年七月十二日鑄御馬
院印

紹興孳生馬監

紹興二年十月戊子朔

一云十月辛卯

置孳生馬監于饒州以

守臣提領仍選使臣五人專主其事擇官田為牧地

上謂

輔臣呂頤浩復孳生馬監就水草地命三省樞府措置

三年七月甲戌復置官提

舉四年四月庚寅又置監于臨安之餘杭及南蕩以楊

忠憫提點

會要八月十八日置孽生監于餘杭南水草處

五年三月庚子罷之

先是三年八月十九日庚子提舉饒州孽生監牧却漸言廣牧地備棚井儲草料置林木置烽堠濠塹於雙港

置牧

紹興三年六月二十三日_上曰馬政不可緩然

須擇人而任之十三年五月癸亥

是月御射殿閱馬

上謂大臣

曰議者言南地不宜牧馬朕措置二三年已得駒數百

矣先是蜀中買馬歲付鎮江牧之十九年正月庚辰分

送江上諸軍仍立賞罰後又置監於郢鄂之間四月六

日詔馬五百匹為一監壯一而牝四之監分四羣歲產

駒三分及斃二分以上有賞罰

市馬南於邕管西於岷黎

隆興元

年九月十六日樞使張浚請置孳生監於揚州十

月詔守臣向子固措置二年二月十二日子固請以

一千匹為一監五月廢乾道四年正月二十九日命

趙搏於漢陽軍置馬監

以收發馬監為名

十二月七日四川宣

撫使虞允文言京西荆南宜置孳生監六年三月劉珙

於荆南龍居山牧養五百匹六月趙搏于德安府應城

縣置孳生監至九年收監馬六百三十匹五月罷南蕩

馬監以田還民

一本云乾道四年十一月十九日罷御前南蕩孳生馬監

凡戰馬

悉仰川秦廣三邊

建炎四年五月戊辰李棡請

市廣西馬紹興三年正月壬午置司邕州市於羅殿

自杞大理諸蠻

紹興二年初命廣西經畧司即韶州

撥內帑錢三十萬緡市戰馬於是神武諸軍皆缺焉六

月癸巳以三百騎賜岳飛癸丑以百騎賜張俊七月癸

亥選千騎赴行在

紹興三年四月辛卯賜韓世忠廣

馬七綱

紹興三年十一月丁丑初令賓橫宜觀四州

守臣顓管買發戰馬如邕州例 乾道元年十月命夔

路造舟

蜀馬自利州
順流而下

明年二月吳璘由水道先發宕昌

西馬五十綱三年十月庚子宣撫允文言均房路比水道減十之九以圖上之十一月二十九日已已罷馬船

乾道秦川買馬之額歲為萬一千九百匹有奇六年

十二月二十二日兵侍王之奇言蜀馬綱煩費請於成

都興元襄陽各置司牧營詔宣撫使相度 邕州買馬

格大觀中所定有八等今之買馬多出於羅殿自杞諸

蠻而自彼乃以錦綵博于大理世稱廣馬其實非也

隨馬

尺寸為
價低昂

橫山寨博馬場互市之制以銀鹽綵錦相參

而行 陝西歲市馬萬有八千而熙秦通遠十居七八
所謂階岷纔四千耳蜀惟黎文敘等許以互市其數不
過階岷西馬增至六千黎文諸郡俱溢舊額良駑相半
效牽萬里行者踣於道至者贏于廐數雖加多用則不
足 川秦市馬分為二一曰戰馬生於西邊二曰羈縻
馬產于西南諸蠻 大理地連西戎雖互市於廣南猶

西馬也 建炎元年六月丙戌李綱議買馬曰今行在之馬不滿五千丁亥詔文臣許養馬一匹餘官吏士民之有馬者並赴官為三等價值 建炎四年九月己未韓世忠進馬高五尺一寸却之紹興七年五月廣右進出格馬十匹上留其一餘付殿前司上曰馬之良者不必西北

紹興牧馬監

三年七月己未初置提舉孳生牧馬監官於饒州置司

廢年一
百人

時益市馬於廣西故先擇牧地置官四年李械

遣人入大理國買馬二月乙巳明橐言於邊防未便臣
講究買馬之術有七深入蠻國誘之不惜其直厚其繒
綵鹽貨之本待以恩禮要約分明禁止官吏侵欺信賞
必罰以督之馬悉歸朝而後付將帥三年正月壬午密
院請即邕州置買馬司馬必四尺二寸以上每百匹為
一綱自是歲得千匹二月辛卯初置廣西提舉買馬司於賓州
經畧司毋得預撥上供封樁內藏錢二十七萬緡欽州

鹽二百萬斤為買馬費以李預為提舉

未幾廢仍以帥臣領歲額

一千五百匹十一年二千四百五十匹帥胡舜陟等遷

官十三年五月庚申諭大臣曰人言南地不宜牧馬

朕自創行雖所養不多方二三年已得駒數百又

曰國家自有故事京城門外便有孳生監每年所

得甚多祖宗用意可見也遂即射殿引馬召輔臣

同觀之甲子奏牧馬事上曰此事在得人得張建

壽付之更無損仰模圓穹房為駟廐車駕驂服之

不足煩語其牧擾則漢武未央承華橐泉之殿不足尚
量其蕃阜則周秦兩漢之富不足羨也 秉心塞淵騶
牝三千思無邪思馬斯徂 汧渭之間未嘗無牧而非
子獨能蕃息於周汧隴之間未嘗無牧而張萬歲獨能
蕃息於唐此得人之效也 鄭駟出河南而不可乘唐
馬育西戎之地而多至二百倍 以官民通牧者周也
牧於民而用於官者漢也牧於官而給於民者唐也國
朝始則牧之在官後則蓄之於民又其後則市之於戎

狄 伯翳宜生之德日碑善養之功 駭象輿配鉤陳

激電躡景 雙瞳夾鏡兩權協月 旦刷幽燕晝秣

荆越 寶鉸星躔鏤章霞布 紫燕駢銜綠蛇銜轂纖

驪接趾秀騏齊子 騰光吐圖疇德瑞聖 乾象宣精

馬惟天駟水瑞挺質馬實地類 稟氣靈淵受精皎月

毛御風蹄踐雪舉籥雲低噴沙 風駿霧鬣 矯矯

龍性天骨開張 意態雄傑駿尾蕭梢 龍駒沛艾驥

子權奇 赴春衢整秋御虬踊螭騰麟超鳳翥 房駟

之精降為驪駢絡黃金之羈浴天池之波 鼓鬣雲衢

弄影星河飲以玉池秣之瑶草 雲螭月駟天儲其英

余吾渥水地炳其靈 乘黃茲白之駟 金絡玉珂

神行電邁 史克在垆之頌燕公監牧之作 戎事之

中馬政為重馬之有牧其來尚矣 禹貢云萊夷作牧

周官云牧田任遠郊之地宣王中興有考牧之詩僖

公遵伯禽之法有在垆之頌漢唐之盛苑監實繁 兵

家制勝莫如馬步兵雖多十不當馬軍之一 上昭天

殿天駟下列廐人校人乾道為良坤元利牝駒從渥水

駿發中廐

一作廐


屈產貴其能鳴雁門多其美脊豈止宗

生冀北族施汧西其名則血汗山子桃驂綠耳金喙騰
黃騶吾吉光蒲梢啓服野麋娥鹿白蟻雞斯蜚鴻母兒
遺風騷褭茲白纖離項王之騅苻主之騶桓氏之驄晉
侯之駮魏公絕影唐國驕驍劉之的盧呂之赤兔其狀
則八尺之戎七尺之騄六尺之驕三尺之果下文臂花
肩陰唇白顛握腕作足昆蹄素懸縞州如練紫目如電

有駝有騾有翎有驪騭駘異羣驪駢亦分散如摘錦聚
若屯雲 鳳臆麟鬐青虬紫燕朝刷閨風夕洗天泉
於風駟戰於雅車攻或庶幾焉 異體峯生殊相逸發
簡偉塞門獻狀絳闕 鴻驚龍翥 總六轡以收賢掩
七戎而得駿 稟靈月駟祖雲螭兮 效足中黃 聲
八鸞以節步 文駟列于華廡 飾金鍔之倏爍揚玉
鑾之玲瓏 齊飲食視良駕 膚芻屑涼網惡去害
駕紅陽之飛燕驂唐公之肅爽 服飛兔之中乘騁華

騃之驂輪 踈虛騰雲乘風度津 神奔電驅星流矢
驚 五龍舜駕八駿周驅 綠蛇金策紫燕瑯鞍 自
天而降行地無疆武藉其威文榮其德 攬轡舒節凌
雲先螭 般于游畋作鏡前王鑒穆武憲文光 月晷
呈祥乾維効氣賦景河房承靈天駟 出余吾之水服
駒駖之廐 價匹龍媒聲齊驥子河精耀采似伏波之
鑄銅震象飛文笑東瀛之刻玉 鉗旦大丙之駕王良
造父之御羈金絡月逸氣稜稜 虎班龍文之逸蘭池

蒲梢之馭



玉海卷一百四十九